

元史


卷十六之十九

第五

555

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUL 30 1936

T2455.21



Harvard College Library Imaging Services <http://imaging.harvard.edu>

元史卷十六

本紀第十六

塔佛大學漢和
圖書館珍藏印

皇明翰林學士雷奎知制誥兼脩國史臣宋濂

翰林待制承直郎知制誥兼國史院編脩官臣王禕等奉勅脩

朝議大夫國子監祭酒臣楊道賓

奉訓大夫右春坊右諭德管國子監業事臣蕭雲舉等奉勅重校刊

世祖十三

二十七年春正月戊申改大都路總管府為都總管府
庚戌太白犯牛改儲侍提舉司為軍儲所秩從三品以
河東山西道宣慰使阿里火者為尚書右丞宣慰使如
故癸丑太陰犯井敕從臣子弟入國子學安南國王陳

日烜遣其中大夫陳克用來貢方物乙卯造祀天幄殿
高麗國王王瞻遣使來貢方物丁巳遣使代祀岳瀆海
神后土戊午遼陽自乃顏之叛民甚疲敝發鈔五千八
十錠賑之己未賜鎮遠王牙忽都靖遠王合帶塗金銀
印各一章吉寇甘木里諸王朮伯拜答寒亦憐真擊走
之庚申賑馬站戶饑給滕竭兒回回屯田三千戶牛種
辛酉營懿州倉壬戌造長甲給北征軍乙丑伸思八兒
朮答兒移刺四十石抹蠻忒四人以謀不軌伏誅丙寅
合丹餘寇未平命高麗國發耽羅戍兵千人討之賜河
西質子軍五百人馬丁卯熒惑犯房高麗國王王瞻言

臣昔宿衛京師遭林衍之叛國內大亂高麗民居大同
者皆籍之臣願復以還高麗爲民從之己巳改西南番
總管府爲永寧路辛未賜也速帶兒所部萬人鈔萬錠
豐閏署田戶饑給六十日糧無爲路大水免今年田租
癸酉忻都所部別笏兒田戶饑給九十日糧降臨淮府
爲盱眙縣隸泗州復立興文署掌經籍板及江南學田
錢穀合丹寇遼東海陽二月乙亥朔立全羅州道萬戶
府江西諸郡盜未平詔江淮行省分兵一千益之命太
僕寺母隸宣徽院丙子新附屯田戶饑給六十日糧順
州僧道士四百九十一人饑給九十日糧戊寅太陰犯

畢開元路寧遠等縣饑民站戶逃徙發鈔二千錠賑之
播州安撫使楊漢英進雨氈千駙馬鐵別赤進羅羅斯
雨氈六十刀五十弓二十已卯興州興安饑給九十月
糧庚辰伯答罕民戶饑給六十日糧辛巳括河間昔寶
赤戶口癸未泉州地震乙酉賑新附民居昌平者丙戌
改奉先縣爲房山縣泉州地震巳丑江西羣盜鍾明亮
等復降詔徙爲首者至京師而給其餘黨糧浙東諸郡
饑給糧九十月庚寅太陰犯亢辛卯復立南康興國權
茶提舉司秩從五品發虎賁更休士二千人赴上都修
城河間路任丘饑給九十月糧癸巳晉陵無錫二縣霖

雨害稼並免其田租江西賊華大老黃大老等掠樂昌
諸郡行樞密院討平之闍兀所部闡遺戶饑給六十日
糧常寧州民遭羣盜之亂免其田租巳亥保定路定興
饑發粟五千二百六十四石賑之辛丑唆歡禾稼不登
給九十月糧三月乙巳中山畋戶饑給六十日糧戊申
廣濟署饑給粟二千二百五十石以爲種壬子熒惑犯
鉤鈴薊州漁陽等處稻戶饑給三十日糧戊午出忙安
倉米賑燕八撒兒所屬四百二十人已未改雲南蒙憐
甸爲蒙憐路軍民總管府蒙萊甸爲蒙萊路放罷福建
獵戶沙魚皮戶爲民以其事付有司總之發雲州民夫

元史卷十六
本紀三
鑿銀洞永昌站戶饑賣子及奴產者甚衆命甘肅省贖
還給米賑之併福泉二州人匠提舉司爲一仍放無役
者爲民庚申陞御史臺侍御史正四品治書侍御史正
五品增蒙古經歷一員從五品罷行司農司及各道勸
農營田司增提刑按察司僉事二員總勸農事四川行
省舊移重慶成都之民苦於供給詔復徙治成都立江
南營田提舉司秩從五品掌僧寺貲產放壽穎屯田軍
千九百五十九戶爲民撤江南戍兵代之凡工匠隸呂
合刺阿斤哥段貞無役者皆區別爲民詔風憲之選仍
歸御史臺如舊制置金竹府大隘等四十二砦蠻夷長

官癸亥建昌賊丘元等稱大老集衆千餘人掠南豐諸
郡建昌副萬戶擒斬之甲子楊震龍餘衆剽浙東總兵
官討賊者多俘掠良民敕行御史臺分揀之凡爲民者
千六百九十五人庚午以建昌路廣昌縣經鍾明亮之
亂免其田租九千四百四十七石辛未太平縣賊葉大
五集衆百餘人寇寧國皆擒斬之夏四月癸酉朔大駕
幸上都婺州螟害稼雷雨大作螟盡死丙子太陰犯井
辛巳命大都路以粟六萬二千五百六十四石賑通州
河西務等處流民芍陂屯田以霖雨河溢害稼二萬二
千四百八十畝有奇免其租癸未罷海道運糧萬戶府

江淮行省言近朝廷遣白絜矩來與沙不丁議令發兼
并戶借宋宗族赴京人心必致動搖江南之民方患增
課料民括馬之苦宜俟它日行之從之阿速敦等二百
九十五人乏食命驗其實給糧賑之改利津海道運糧
萬戶府爲臨清御河運糧上萬戶府諸王小薛部曲萬
二千六十一戶饑給六十日糧發六衛漢軍萬人伐木
爲修城具甲申以薦饑免今歲銀俸鈔其在上都大都
保定河間平灤者萬一百八十錠在遼陽省者千三百
四十八錠有奇丙戌遣桑吉刺失等詣馬八兒國訪求
方伎士壬辰熒惑守氐十餘日癸巳河北十七郡蝗千

戶也先小闊闊所部民及真魯不別等民戶並饑敕河
東諸郡量賑之千戶也不干所部乏食敕發粟賑之太
傅玉呂魯言招集幹者所屬亦乞烈今已得六百二十
一人令與高麗民屯田宜給其食敕遼陽行省驗實給
之平山真定棗強三縣旱靈壽元氏二縣大雨雹並免
其租丁酉以鈔二千五百錠賑昌平至上都站戶貧乏
者定興站戶饑給三十日糧己亥命考大都路貧病之
民在籍者二千八百三十七人發粟二百石賑之庚子
合丹復寇海陽復立安和署從六品五月乙巳罷秦王
典藏司收其印括江南闌遺人雜畜錢帛合丹寇開元

戊申江西行省管如德江西行院月的迷失合兵討反
寇鍾明亮明亮降詔縛致闕下如德等留不遣明亮復
率衆寇贛州樞密院以如德等違詔縱賊請詰之從之
詔罷江西行樞密院庚戌陝西南市屯田隕霜殺稼免
其租壬子賜諸王鐵木兒等軍一萬七百人糧一人一
從者五石二人一從者七石五斗丙辰發粟賑御河船
戶敘州等處諸部蠻夷進雨糧八百戊午移江西行省
於吉州以便捕盜尚書省遣人行視雲南銀洞獲銀四
千四十八兩奏立銀場官秩從七品出魯等千一百一
十五戶饑給六十日糧癸亥敕諸王分地之民有訟王

傳與所置監郡同治無監郡者王傳聽之平灤民萬五千
四百六十五戶饑賑粟五千石徽州績溪賊胡發饒必
成伏誅乙丑太陰犯填星丙寅罷奉宸庫遷江西行尚
書省叅政楊文燦爲左丞文燦踰歲不之官詔以外刺
帶代之外刺帶至文燦復署事桑哥乃奏文燦陞右丞
江西行省言吉贛湖南廣東福建以禁弓矢賊益發乞
依內郡例許尉兵持弓矢從之巳巳立雲南行御史臺
命徹里鐵木兒所部女直高麗契丹漢軍輸地稅外並
免他徭江陰大水免田租萬七百九十石庚午復置諸
王也只里王傳秩正四品尚玆署廣備等屯大水免其

租伯要民之食命撒的迷失以車五百兩運米千石賑之婺州永康東陽處州縉雲賊呂重二楊元六等反浙東宣慰使史弼擒斬之泉州南安賊陳七師反討平之括天下陰陽戶口仍立各路教官有精于藝者歲貢各一人六月壬申朔陞閩鹽州爲栢興府降普樂州爲閩鹽縣金州爲金縣河溢太康沒民田三十一萬九千八百餘畝免其租八千九百二十八石納鄰等站戶饑給九十日糧甲戌桑州總管黃布蓬那州長羅光寨安郡州長閉光過率蠻民萬餘戶內附丙子放保定工匠楚通等三百四十一戶爲民庚辰從江淮行省請陞廣濟

庫爲提舉司秩從五品用江淮省平章沙不丁言以叅政王巨濟鈞考錢穀有能賞鈔五百錠繕寫金字藏經凡糜金三千二百四十四兩廣州增城韶州樂昌以遭畚賊之亂並免其田租杭州賊唐珍等伏誅巳丑熒惑犯房辛卯敕應昌府以米千二百石給諸王亦只里部曲壬辰別給江西行省印以便分省討賊泉州大水丙申發侍衛兵萬人完都城丁酉大司徒撒里蠻翰林學士承旨兀魯帶進定宗實錄巳亥棣州厭次濟陽大風雹害稼免其租庚子從江西省請發各省戍兵討賊辛丑免河間保定平灤歲賦絲之半懷孟路武涉縣汴梁

路祥符縣皆大水蠲田租八千八百二十八石秋七月
終南等屯霖雨害稼萬九千六百餘畝免其租丙午禁
平地忙安倉釀酒犯者死戊申江西霖雨贛吉袁瑞建
昌撫水皆溢龍興城幾沒癸丑罷緬中行尚書省江淮
省平章沙不丁以倉庫官盜欺錢糧請依宋法黜而斷
其腕帝曰此回回法也不允免大都路歲賦絲戊午貴
州猫蠻三十餘人作亂劫順元路入其城遂攻阿牙寨
殺傷官吏其衆遂盛湖廣省檄八番蔡州均州二萬戶
府及八番羅甸宣慰司合兵討之鳳翔屯田霖雨害稼
免其租建平賊王靜照伏誅辛酉熒惑犯天江壬申駐

蹕老鼠山西乙丑蕪湖賊徐汝安孫惟俊等伏誅丙寅
雲南閣力白衣甸酋長凡十一甸內附丁卯用桑哥言
詔遣慶元路總管毛文豹搜括宋時民間金銀諸物已
而罷之滄州樂陵旱免田租三萬三百五十六石江夏
水溢害稼六千四百七十餘畝免其租魏縣御河溢害
稼五千八百餘畝免其租百七十五石八月辛未朔日
有食之併廣東道真陽滄光二縣爲英德州沁水溢害
箕氏民田免其租禁諸人毋沮平陽太原大同宣課丁
丑廣州清遠大水免其租庚辰免大都平灤河間保定
四路流民租賦及酒醋課丁亥復徙四川南道宣慰司

于重慶府以南安贛建昌豐州嘗罹鍾明亮之亂悉免其田租癸巳地大震武平尤甚壓死按察司官及總管府官王連等及民七千二百二十人壞倉庫局四百八十間民居不可勝計巳亥帝聞武平地地震慮乃顏黨入寇遣平章政事鐵木兒樞密院官塔魯忽帶引兵五百人往視九月壬寅河東山西道饑敕宣慰使阿里火者炒米賑之癸卯歲星犯鬼申嚴漢人田獵之禁乙巳禁諸王遣僧建寺擾民敕河東山西道宣慰使阿里火者發大同鈔本二十萬錠糴米賑饑民平章政事闊里鐵木兒帥師與合丹戰于瓦法大破之丁未御河決高唐沒

民田命有司塞之戊申武平地地震盜賊乘隙剽劫民愈憂恐平章政事鐵木兒以便宜蠲租賦罷商稅弛酒禁斬爲盜者發鈔八百四十錠轉海運米萬石以賑之金竹府知府掃閭貢馬及雨氈且言金竹府雖內附蠻民多未服近與趙堅招降竹古弄古魯花等三十餘寨乞立縣設長官總把叅用土人從之巳酉福建省以管內盜賊蠡起請益戍兵命江淮省調下萬戶一軍赴之發蒙古都萬戶府探馬赤軍五百人戍鄂州辛亥修東海廣德王廟丙辰赦天下丁卯命江淮行省鈞考行教坊司所總江南樂工租賦置四巡檢司于宿遷之北以所

罷陸運夫爲兵護送會通河上供之物禁發民挽舟冬
十月壬申封皇孫甘麻刺爲梁王賜金印出鎮雲南癸
酉享于太廟甲戌立會通汶泗河道提舉司從四品丁
丑尚書省臣言江陰寧國等路大水民流移者四十五
萬八千四百七十八戶帝曰此亦何待上聞當速賑之
凡出粟五十八萬二千八百八十九石己卯增上都晉
守司副留守判官各一員從甘肅行省請簽管內民千
三百人爲兵以戍其境辛巳太白犯斗只深所部八魯
刺思等饑命寧夏路給米三千石賑之禁大同路釀酒
乙酉門答占自行御史臺入覲梁洞梁宮朝吳曲洞吳
湯暖等凡二十洞以二千餘戶內附丁亥賜北邊幣帛
十萬匹己丑新作太廟登歌宮懸樂以昔寶赤歲取鷓
鴒成都擾民罷之十一月辛丑廣濟署洪濟屯大水免
租萬三千一百四十一石興松二州隕霜殺禾免其租
隆興苦鹽灤等驛饑發鈔七千錠賑之丁未大同路蒙
古多冒名支糧置千戶百戶十員以達魯花赤總之食
糧戶以富爲貧者籍家貲之半戊申太陰掩鎮星桑哥
言向奉詔內外官受命不赴及受代官居五年不赴銓
者罷不復叙臣謂苟無大故不可終棄帝復允其請江
淮行省平章不憐吉帶言福建盜賊已平惟浙東一道

地極邊惡賊所巢穴復還三萬戶以合刺帶一軍戍沿海明台亦怯烈一軍戍溫處札忽帶一軍戍紹興婺其寧國徽初用土兵後皆與賊通今以高郵泰兩萬戶漢軍易地而戍揚州建康鎮江三城跨據大江人民繁會置七萬戶府杭州行省諸司府庫所在置四萬戶府水戰之法舊止十所今擇瀕海沿江要害二十二所分兵閱習伺察諸盜錢塘控扼海口舊置戰船二十艘故海賊時出奪船殺人今增置戰船百艘海船二十艘故盜賊不敢發從之庚戌罷雲南會川路采碧甸子甲寅禁上都釀酒乙卯貴赤三百三十戶乏食發粟賑之己未

禁山後釀酒庚申賜伯顏所將兵幣帛各萬二千四百匹綿三千四百斤辛酉太陰掩左執法隆興路隕霜殺稼免其田租五千七百二十三石壬戌大司徒撒里蠻翰林學士承旨兀魯帶進太宗實錄癸亥河決祥符義唐灣太康通許陳潁二州大被其患甲子御史臺言江南盜起討賊官利其剽掠復以生口克贈遺請給還其家帝嘉納之徙河北河南道提刑按察司治許州罷大都東西二驛脫脫禾孫以通政院總之乙丑易水溢雄莫任丘新安田廬漂沒無遺命有司築堤障之丙寅括遼陽馬六千匹擇肥者給闍里鐵木兒所部軍丁卯立

新城權場平地脫脫禾孫遣使鉤考延安屯田降南雄州爲保昌縣韶州爲曲江縣十二月辛未以衛尉院爲太僕寺戊寅免大都平灤保定河間自至元二十四年至二十六年逋租十三萬五百六十二石己卯命樞密院括江南民間兵器及將士習武如戊子歲詔甲申遣兵部侍郎靳榮等閱實安西鳳翔延安三道軍戶元籍四千外復得三萬三千二百八十丁樞密院欲以爲兵桑哥不可帝從之丙戌興化路仙游賊朱三十五集衆寇青山萬戶李綱討平之京兆省上屯田所出羊價鈔六百九錠敕以賜札散暗伯民貧乏者辛卯太陰犯亢

乙未初分萬億爲四庫以金銀輸內府至是立提舉富寧庫秩從五品以掌之大同路民多流移免其田租二萬一千五百八石洪贊灤陽驛饑給六十日糧不耳答失所部減乞里饑給九十日糧詔諸王乃蠻帶遼陽行省平章政事薛闡于右丞洪察忽摘蒙古軍萬人分戍雙城及婆娑府諸城以防合丹兵己亥省灤陽路爲縣入建康湖廣省上二年宣課珠九萬五百一十五兩處州青田賊劉甲乙等集衆萬餘人寇温州平陽是歲賜諸王公主駙馬金銀鈔幣如歲例命帝師西僧遞作佛事坐靜于萬壽山厚載門茶罕腦兒聖壽萬安寺桓州

南屏庵雙泉等所凡七十二會斷死罪七十二人

二十八年春正月壬寅太白熒惑鎮星聚奎癸卯給諸王愛牙赤印命玄教宗師張留孫置醮祠星三日上都民仰食于官者衆詔備民運米十萬石致上都官價石四十兩命留守木八刺沙總其事辛亥罷汴梁至正陽杞縣睢州中牟鄆唐鄧十二站站戶爲民癸丑高麗國遣使來貢方物丁巳遣貴由赤四百人北征辛酉罷江淮漕運司併於海船萬戶府由海道漕運併浙西金玉人匠提舉司入浙西道金玉人匠總管府降無爲和州二路六安軍爲州巢州爲縣入無爲並隸廬州路陞安

豐府爲路降壽春府懷遠軍爲縣懷遠入濠州並隸安豐路陞各處行省理問所爲四品免江淮貧民至元十二年至二十五年所逋田租二百九十七萬六千餘石及二十六年未輸田租十三萬石鈔千一百五十錠絲五千四百斤綿千四百三十餘斤罷淘金提舉司立江東兩浙都轉運使司壬戌以札散禿禿合總兵于瓮古之地命有司供其軍需敕大同路發米賑瓮古饑民尚書省臣桑哥等以罪罷二月辛未賜也速帶兒所部兵騾馬萬疋徙萬億庫金銀入禁中富寧庫尚書省言大同仰食于官者七萬人歲用米八十萬石遣使覆驗不

當給者萬三千五百人乞徵還官從之癸酉以隴西四
川總攝輦真木納思爲諸路釋教都總統改福建行省
爲宣慰司隸江西行省詔行御史臺勿聽行省節度雲
南行省言敘州烏蒙水路險惡舟多破溺宜自葉稍水
站山陸經中慶又經鹽井土老必撒諸蠻至敘州慶符
可治爲驛路凡立五站從之也速帶兒汪總帥言近制
和顧和買不及軍家今一切與民同詔自今軍勿輸丙
子罷徵理司上都太原饑免至元十二年至二十六年
民間所逋田租三萬八千五百餘石遣使同按察司賑
大同太原饑民口給糧兩月或三月以桑哥黨與罷楊

州路達魯花赤唆羅兀思遣官覆驗水達達咸平貧民
賑之丁丑以太子右詹事完澤爲尚書右丞相翰林學
士承旨不忽木平章政事詔告天下以列兀難粳米賑
給貧民己卯遣官持香詣中嶽南海淮瀆致禱立金齒
等處宣慰司都元帥府以上都虎賁士二千人屯田官
給牛具農器用鈔二萬錠以雲南曲靖路宣撫司所轄
地廣民心未安改立曲靖等處宣慰司管軍萬戶府以
鎮之辛巳以湖廣行省八番羅甸司復隸四川省壬午
以桑哥沮抑臺綱又箠監察御史命御史大夫月兒魯
辨之癸未太陰犯左執法大駕幸上都是日次大口復

召御史臺及中書尚書兩省官辨論桑哥之罪復以闌
遺監隸宣徽院詔毋沮擾山東轉運使司課程甲申太
白犯昴命江淮行省鈎考沙不丁所總詹事院江南錢
穀乙酉立江淮湖廣江西四川等處行樞密院詔諭中
外江淮治廣德軍湖廣治岳州江西治汀州四川治嘉
定丙戌詔改提刑按察司爲肅政廉訪司每道仍設官
八員除二使留司以總制一道餘六人分臨所部如民
事錢穀官吏奸弊一切委之俟歲終省臺遣官考其功
効以集賢大學士何榮祖爲尚書右丞集賢學士賀勝
爲尚書省參知政事詔江淮行省遣蒙古軍五百漢兵

千人從皇子鎮南王鎮揚州執河間都轉運使張庸仍
遣官鈎考其事丁亥營建宮城南面周廬以寄宿衛之
士執湖廣要束木詣京師戊子籍要束木家貲金凡四
千兩辛卯封諸王鐵木兒不花爲肅遠王賜之印壬辰
雨壞太廟第一室奉遷神主別殿癸巳籍桑哥家貲遣
行省行臺官發粟賑徼之績溪杭之臨安餘杭於潛昌
化新城等縣饑民命江淮行省叅政燕公楠整治鹽法
之弊丁酉詔加嶽瀆四海封號各遣官詣祠致告三月
己亥朔真定河間保定平灤饑平陽太原尤甚民流移
就食者六萬七千戶饑而死者三百七十一人桑哥妻

第八吉由爲燕南宣慰使以受賂積贓伏誅什桑哥德
政碑大原饑嚴酒禁丁未太陰犯御女巳酉太陰犯右
執法庚戌太陰犯太微東垣上相甲寅常德路水免田
一萬三千九百石乙卯太白犯五車乃顏所屬牙兒
馬兀等同女直兵五百人追殺內附民餘千人遣塔海
將千人平之辛酉呂連站木赤五十戶饑賑三月糧發
侍衛兵營紫檀殿壬戌以甘肅行省右丞崔或爲中書
右丞南丹州莫國麟入覲授國麟安撫使三珠虎符杭
州平江等五路饑發粟賑之仍弛湖泊蒲魚之禁溧陽
太平徽州廣德鎮江五路亦饑賑之如杭州武平路饑

百姓困於盜賊軍旅免其去年田租凡州郡田嘗被災
者悉免其租不被災者免十之五罷甘州轉運司江淮
豪家多行賄權貴爲府縣卒史容庇門戶遇有差賦惟及
貧民詔江淮行省嚴禁之賑遼陽武平饑民仍弛捕獵
之禁夏四月巳巳禁屠宰牝羊甲戌詔各路府州司縣
長次官兼管諸軍輿魯以地震故免侍衛兵籍武平者
今歲徭役增置欽察衛經歷一員用漢人爲之餘不得
爲例庚辰弛杭州西湖禽魚禁聽民網罟丙戌詔凡負
幹脫銀者入還皆以鈔爲則乙未歲星犯輿鬼以沙不
丁等米賑江南饑民召朱清張瑄詣闕庚寅併總制院

入宣政院以鈔法故召葉李還京師乙未徙湖廣行樞
密院治鄂州丙申以米三千石賑闕里吉思饑民五月
戊戌召江西行樞密院副使阿里詣闕升章佩監秩三
品遣脫脫塔刺海忽辛三人追究僧官江淮總攝楊璉
真加等盜用官物以叅知政事廉希恕爲湖廣等處行
省右丞行海北海南道宣慰使都元帥瓊州安撫使陳
仲達海北海南道宣慰使都元帥湖廣行省左右司郎
中不顏于思別十八里副元帥王信並同知海北海南
道宣慰司事副元帥並佩虎符將二千二百人以征黎
蠻僚屬皆從仲達辟置立左右兩江宣慰司都元帥府

壬寅太陰犯少民徙江淮行樞密院治建康甲辰中書
省臣麥朮丁崔彧言桑哥當國四年諸臣多以賄進親
舊皆授要官唯以欺蔽九重朘削百姓爲事宜令兩省
嚴加考覈並除名爲民從之要朮以桑哥妻黨爲湖
廣行省平章至是坐不法者數十事詔械致湖廣省誅
之辛亥以太原及杭州饑免今歲田租增河東道宣慰
使一員徵太子贊善劉因因前爲太子贊善以繼母病
去至是母亡以集賢學士徵之不起罷脫脫塔刺海忽
辛等理筭僧官錢穀罷江南六提舉司歲輸木綿鞏昌
舊惟總帥府桑哥特升爲宣慰司以其弟答麻刺答思

爲使桑哥敗懼誅自殺至是復總帥府增置異珎御帶
二庫秩從五品並設提點使副各一員減中外冗官三
十七員宮城中建蒲萄酒室及女工室詔以桑哥罪惡
繫獄按問誅其黨要束木八吉等發兵塞晃火兒月連
地河渠修城堡令蒙古戍兵屯田川中以禦寇癸丑罷
尚書省事皆入中書改尚書右丞相右詹事完澤爲中
書右丞相平章政事麥朮丁不忽木並中書平章政事
尚書右丞何榮祖中書右丞尚書左丞馬紹中書左丞
叅知政事賀勝高翥並叅知中書政事征東行尚書省
左丞相駙馬高麗國王王暎爲征東行中書省左丞相

罷大都燒鈔庫仍舊制各路昏鈔令行省官監燒增置
戶部司計工部司程正七品甲寅太陰犯牛販上都桓
州榆林昌平武平寬河宣德西站女直等站饑民乙卯
以政事悉委中書仍遣使布告中外詔禁失陷錢糧者
託故詣京師丁巳建白塔二各高一丈一尺以居呪師
朶四的性吉等七人何榮祖以公規治民禦盜理財等
十事緝爲一書名曰至元新格命刻版頒行使百司遵
守桑哥嘗以劉秉忠無子收其田土其妻竇氏言秉忠
嘗鞠猶子蘭章爲嗣敕以地百頃還之己未以門答占
復爲御史大夫行御史臺事高麗國王王暎乞以其子

元史卷十九
本紀一
一
諫爲世子詔立諫爲高麗王世子授特進上柱國賜銀
印六月丁卯朔禁蒙古人往回回地爲商賈者湖廣饑
敕以刺里海牙米七萬石賑之辛巳洞蠻鎮遠立黃平
府乙酉以雲南諸路行省叅知政事兀難爲梁王傳洗
國王洞主市備什王弟同來朝益江淮行院兵二萬擊
郴州桂陽寶慶武岡四路盜賊以汴梁逃人男女配偶
成家給農具耕種丙戌勅屯田官以三歲爲滿互於各
屯內調用宣諭江淮民恃總統璉真加力不輸租者依
例徵輸辛卯太陰犯畢癸巳以漣海二州隸山東宣慰
司秋七月丙申朔雲南省叅政怯刺言建都地多產金

可置冶令旁近民煉之以輸官從之己亥太白犯井詔
諭尚州等處諸洞蠻夷庚子徙江西行樞密院治贛州
乙巳大都饑出米二十五萬四千八百石賑之戊申揚
州路學正李淦上言人皆知桑哥用羣小之罪而不知
尚書右丞葉李妄舉桑哥之罪宜斬葉李以謝天下有
旨驛召淦詣京師淦至而李卒除淦江陰路教授以旌
直言給還行臺監察御史周祚妻子祚嘗劾行尚書省
官桑哥誣以他罪流祚于愍答孫妻子家貲入官及是
還之禁屠宰馬牛敕江南重囚依舊制聞奏處決罷江
南諸省買銀提舉司遣官招集宋時涅手軍可克兵者

八萬三千六百人以蒙古漢人宋人參爲萬戶千戶百戶領之遼陽諸路連歲荒加以軍旅民苦饑發米二萬石賑之巳酉召交趾王弟陳益稷右丞陳巖鄭鼎子那懷並詣京師癸丑賜師壁洞安撫司師壁鎮撫所師羅千戶所印安撫司從三品餘皆五品丁巳桑哥伏誅募民耕江南曠土戶不過五頃官授之券俾爲永業三年後徵租遣憨散總兵討平江南盜賊巳未降江陰路爲州宜興府爲縣並隸常州路移揚子縣治新城分華亭之上海爲縣松江府隸行省罷淘金提舉司江淮工匠提舉司凡五以其事並隸有司雨壞都城發兵二萬人

築之增置各衛經歷一員俾漢人爲之壬戌弛畿內秋耕禁八月乙丑朔平陽地震壞民廬舍萬有八百二十六區壓死者百五十人丙寅太白犯輿鬼巳巳置中書省檢校二員秩正七品俾考覈戶工部文案踈緩者罷江西等處行泉府司大都甲匠總管府廣州人匠提舉司廣德路錄事司罷泉州至杭州海中水站十五所撫州路饑免去歲未輸田租四千五百石馬八兒國遣使進花牛二水牛土彪各一丙子太陰犯牽牛大名之清河南樂諸縣霖雨害稼免田租萬六千六百六十九石巳卯詔諭思州提省溪洞官楊都要招安叛蠻悔過來

歸者與免本罪罷雲南四州立東川府癸未歲星犯軒
轅大星乙酉遣麻速忽阿散乘傳詣雲南捕黑虎戊子
太白犯軒轅大星併犯歲星咀喃藩邦遣馬不刺罕丁
進金書寶塔及黑獅子番布藥物婺州水免田租四萬
一千六百五十石辛卯命工部造飛車五輛癸巳太陰
掩熒惑九月辛丑以平章政事麥木丁商議中書省事
復以咱喜魯丁平章政事代之乙巳景州河間等縣霖
雨害稼免田租五萬六千五百九十五石丙午立行宣
政院治杭州巳酉設安西延安鳳翔三路屯田總管府
庚戌太白犯右執法襄陽南障縣民李氏妻黃一產三

男辛亥安南王陳日烜遣使上表貢方物且謝不朝之
罪徽州績溪縣賊未平免二十七年田租禁宣德府田
獵王子酒醋課不兼隸茶鹽運司仍隸各府縣立乞里
台思至外刺等六驛命海船副萬戶楊祥合迷張文虎
並爲都元帥將兵征瑠求置左右兩萬戶府官屬皆從
祥選辟旣又用福建吳誌斗言祥不可信宜先招諭之
乃以祥爲宣撫使佩虎符阮監兵部員外郎誌斗禮部
員外郎並銀符贛詔往瑠求明年楊祥阮監果不能達
瑠求而還誌斗死于行時人疑爲祥所殺詔福建行省
按問會赦不治乙卯以歲荒免平灤屯田二十七年田

租三萬六千石有奇丙辰熒惑犯左執法戊午太白犯熒惑徙四川行樞密院治成都以八忽答兒秃魯歡唆不闌脫兒赤四翼蒙古兵復隸蒙古都萬戶府庚申以鐵里爲禮部尙書佩虎符阿老瓦丁不刺並爲侍郎遣使俱藍辛酉歲星犯少民免大都今歲田租保定河間平灤三路大水被災者全免收成者半之以別鐵木兒亦列失金爲禮部侍郎使馬八兒國陝西脫西爲禮部侍郎佩金符使于馬都尙衣局織無縫衣冬十月乙丑朔賜薛徹温都兒等九驛貧民三月糧已巳修太廟在真定傾壞者壬申以前緬中行尙書省平章政事雪雪

的斤爲中書省平章政事癸酉享太廟遣使發倉賑大同屯田兵及教化的所部軍士之饑者江淮行省言鹽課不足由私鬻者多乞付兵五千巡捕從之塔刺海張忽辛崔同知並坐理筭錢穀受贓論誅辛巳召高麗國王王王瞻公主忽都魯揭里迷失詣闕癸未羅斛國王遣使上表以金書字仍貢黃金象齒丹頂鶴五色鸚鵡翠毛犀角篤縟龍腦等物高麗國饑給以米一十萬斛罷各處行樞密院事入行省割八番洞蠻自四川隸湖廣行省丙戌太陰犯軒轅大星併御女丁亥洞蠻爛土立定雲府改陳蒙洞爲陳蒙州合江爲合江州嚴山後酒

元史卷十六
本紀
三十一
禁中書省臣言洞蠻請歲進馬五十匹雨氊五十被刀
五十握丹砂雌雄黃等物率二歲一上有詔從其所爲
已丑太陰犯太微東垣上相敕沒入璉真加沙不丁烏
馬兒妻並遣詣京師召行省轉運司官赴京師集議治
賦法辛卯諸王出伯部曲饑給米賑之癸巳武平路饑
免今歲田租以武平路總管張立道爲禮部尙書使交
趾免衛輝種仙茅戶徭役從遼陽行省言以乃顏合丹
相繼叛詔給蒙古人內附者及開元南京水達達等三
萬人牛畜田器詔嚴益都般陽泰安寧海東平濟寧畋
獵之禁犯者沒其家貲之半十一月丙申以甘肅曠土

賜昔寶赤合散等俾耕之壬寅遣左吉奉使新合刺的
音甲辰太白犯房減太府監冗員三十一人罷器備行
內藏二庫詔回回以答納珠克獻及求售者還之留其
估以濟貧者塔义兒塔帶民饑發米賑之給按答兒民
戶四月糧罷海道運糧鎮撫司丙午熒惑犯亢丁未太
陰犯畢昴羅遣使貢東紵百匹太史院靈臺上修祀事
三晝夜甲寅太陰犯歲星郴州路達魯花赤曲列有罪
論誅復置會同館禁沮擾益都淘金乙卯新添葛蠻宋
安撫率洞官阿汾青貴來貢方物監察御史言沙不丁
納速刺丁滅里烏里兒王巨濟璉真加沙的教化的皆

桑哥黨與受賊肆虐使江淮之民愁怨載路今或繫獄或釋之此臣下所未能喻帝曰桑哥已誅納刺丁滅里在獄唯沙不丁朕姑釋之耳武平平灤諸州饑弛獵禁其孕字之時勿捕諭中書議增中外官吏俸戊午金齒國遣阿腮入覲庚申熒惑犯氏辛酉陞宣德龍門鎮爲望雲縣割隸雲州置望雲銀冶十二月乙丑復都水監秩從三品遣官迓雲南鴨池所遣使遼陽洪寬女直部民饑借高麗粟賑給之籍探馬赤八忽帶兒等六萬戶成丁者爲兵丁邗高麗國鴨綠江西十九驛經乃顏反掠其馬畜給以牛各四十大都饑下其價糶米二十萬

石賑之已巳詔罷遣官招集畏兀氏改辰沅靖州轉運司爲湖北湖南道轉運司立葛蠻軍民安撫司宣政院臣言宋全太后瀛國公母子以爲僧尼有地三百六十頃乞如例免徵其租從之辛未以鐵滅爲兵部尙書佩虎符明思昔答失爲兵部侍郎佩金符使于羅字卜兒御史臺臣言鈞考錢穀自中統初至今餘三十年更阿合馬桑哥當國設法已極而其餘黨公取賄賂民不堪命不如罷之有旨議擬以聞壬申立河南江北行中書省治汴梁撒里蠻老壽並爲大司徒領太常寺中書省臣言江南在宋時差徭爲名七十有餘歸附後一切未

徵今分隸諸王城邑歲賜之物仰給京師又中外官吏俸少似宜量添可令江南依宋時諸名征賦盡輸之何榮祖言宜召各省官任錢穀者詣京師集議科取之法以聞從之甲戌詔罷鈎考錢穀應昔年逋負錢穀文卷聚置一室非朕命而視之者有罪仍遣使布告中外庚辰太陰犯御女江北州郡割隸河南江北行中書省改江淮行省爲江浙等處行中書省治杭州賑闕出饑民米闕里帶言乃顏餘黨竄女直之地臣與月兒魯議乞益兵千五百人可平之從之癸未太陰犯東垣上相廣濟署大昌等屯水免田租萬九千五百石平灤路及

豐贍濟民二署饑出米萬五千石賑之別都兒丁前以桑哥專恣不肯仕命仍爲中書左丞丙戌八番洞官吳金叔等以所部二百五十寨民二萬有奇內附詣闕貢方物戊子詔釋天下囚非殺人抵罪者己丑熒惑犯房庚寅熒惑犯鈎鈐升營田提舉司爲規運提點所正四品辛卯濬運糧垣河築隄防授吃刺思八斡節兒爲帝師統領諸國僧尼釋教事賜親王公主駙馬金銀鈔幣如歲例令僧羅藏等迺作佛事坐靜于聖壽萬安涿州寺等所凡五十度遣真人張志仙持香詣東北海嶽濟瀆致禱戶部上天下戶數內郡百九十九萬九千四百

元史卷十六
本紀
四十四江淮四川一千一百四十三萬八百七十八口
五千九百八十四萬八千九百六十四游食者四十二
萬九千一百一十八司農司上諸路所設學校二萬一
千三百餘墾地千九百八十三頃有奇植桑棗諸樹二
千二百五十二萬七千七百餘株義糧九萬九千九百
六十石宣政院上天下寺宇四萬二千三百一十八區
僧尼二十一萬三千一百四十八人斷死刑五十五人

本紀卷第十六

元史卷十七

本紀第十七

皇明翰林學士中大夫知制誥兼脩國史臣宋濂

翰林待制承直郎同知制誥兼國史院編脩官臣王禕等奉勅脩

朝議大夫國子監祭酒臣楊道賓

朝議大夫右春坊右諭德臣國子監司業臣蕭雲舉等奉勅重校刊

世祖十四

二十九年春正月甲午朔以日食免朝賀日食時左右
有珥上有抱氣丙申雲南行中書省言羅甸歸附後改
普定府隸雲南省三十餘年今剌羅甸宣慰安撫司隸
湖南省不便乞罷之仍以其地隸雲南省制曰可戊戌

清州饑就陵州發粟四萬七千八百石賑之己亥命太史令郭守敬兼領都水監事仍置都水監少監丞經歷知事凡八員八作司官舊制六員今分爲左右二司增官二員庚子江西行省左丞高興言江西福建汀漳諸處連年盜起百姓入山以避乞降旨招諭復業福建鹽課旣設運司又設四鹽使司今若設提舉司專領鹽課其酒稅課悉歸有司爲便福建銀鐵又各立提舉司亦爲冗濫請罷去詔皆從之禁商賈私以金銀航海壬寅以武平地震全免去年稅四千五百三十六錠今年量輸之止徵二千五百六十九錠癸卯命玉典赤阿里置

司邕州以便糧餉而以輕軍邏思明州以漢天師張宗演男與棣嗣其教陞利用監正三品甲辰詔江南州縣學田其歲入聽其自掌春秋釋奠外以廩師生及士之無告者貢士莊田則令覈數入官乙巳賜諸王失都兒金千兩丙午河南福建行中書省臣請詔用漢語有旨以蒙古語諭河南漢語諭福建罷河南宣慰司以汴梁襄陽河南南陽歸德皆隸河南行省復割湖廣省之德安漢陽信陽隸荆湖北道蘄黃隸淮西道并淮東道三宣慰司咸隸河南省其荆湖北道宣慰司舊領辰沅澧靖歸常德直隸湖廣省從葛蠻軍民安撫使宋子賢請

詔諭未附平伐大甕眼紫江皮陵潭溪九堡等處諸洞
貓蠻戊申太陰犯歲及軒轅左角巳酉興州之興安宜
興兩縣饑賑米五千石罷南雄韶州惠州三路錄事司
壬子桓州至赤城站戶告饑給鈔計口賑之癸丑罷四
賓庫復會同館初置織造段疋提舉司五八番都元帥
劉德祿言新附洞蠻十五寨請置官府以統之詔設陳
蒙爛土軍民安撫司江西行省伯顏阿老瓦丁言蒙山
歲課銀二萬五千兩初制鍊銀一兩免役夫田租五斗
今民力日困每兩擬免一石帝曰重困吾民民何以生
從之丙辰播州洞蠻因籍戶懷疑竄匿降詔招集之以

行播州軍民安撫使楊漢英爲紹慶珍州南平等處沿
邊宣慰司行播州軍民宣撫使播州等處管軍萬戶仍
佩虎符壬戌召嗣漢天師張與棣赴闕二月甲子朔金
竹酋長騷驢貢馬種各二十有七從其請減所部貢馬
降詔招諭之賜新附黑蠻衣襖遣回命進所產朱砂雄
黃之精善者無則止遣使代祀嶽瀆后土四海乙丑給
輝州龍山里州和中等縣饑民糧一月丁卯畋于近郊
命宿衛受月廩及蒙古軍以艱食受糧者宣徽院仍領
之巳巳太陰犯畢發通州河西務粟賑東安固安薊州
寶坻縣饑民申禁鞭背庚午幹羅思招附桑州生貓羅

甸國古州等峒會長三十一所部民十二萬九千三百二十六戶詣闕貢獻壬申敕遣使分行諸路釋死罪以下輕囚澤州獻嘉禾乙亥立總管高麗女直漢軍萬戶府頒銀印總軍六千人以泉府太卿亦黑迷失鄧州舊軍萬戶史弼福建行省右丞高興並爲福建行中書省平章政事將兵征爪哇用海船大小五百艘軍士二萬人戊寅立征行左右軍都元帥府都元帥四副都元帥二上萬戶府達魯花赤四萬戶皆四副萬戶八鎮撫四各佩虎符詔加高麗王王瞻太保仍錫功臣之號詔從諸王阿秃作亂者朶羅帶以付闊里吉思脫迭出以付

阿里抄兒赤以付月的迷失合麥以付亦黑迷失使從軍自效又詔諸王從合丹作亂者納答兒之鎮南王所聶怯來之合刺合孫答刺罕所阿秃之雲南王所朶列秃之阿里所八里帶之月的迷失所幹里羅忽里帶之東海發義倉官倉糧賑德州齊河清平泰安州饑民庚辰月兒魯等言納速刺丁滅里忻都王巨濟黨比桑哥恣爲不法楮幣銓選鹽課酒稅無不更張變亂之銜命江南理筭者皆嚴急輸期民至嫁妻賣女禍及親鄰維揚錢塘受害最慘無故而隕其生五百餘人其初士民猶疑事出國家今乃知天子仁愛元元而使民至此極

者實桑哥及其凶黨之爲莫不願食其肉臣等議此三人既已伏辜乞依條論坐以謝天下從之牙亦迷失招無籍民千四百三十六戶請隸東宮詔命之耕田辛巳從樞密院臣暗伯等請就襄陽給曲先塔林合刺魯六百三十七戶田器種粟俾耕而食丁亥以汪惟和爲鞏昌等二十四處便宜都總帥兼鞏昌府尹仍佩虎符御史臺月兒魯崔或等言馮子振劉道元指陳桑哥同列罪惡詔令省臺臣及董文用留夢炎等議其一言翰林諸臣撰桑哥輔政碑者廉訪使闔復近已免官餘請聖裁帝曰死者勿論其存者罰不可恕也乞台不花等使

緬國詔令遙授左丞廷議以尙書行使事其副以郎中處之制曰可戊子禁杭州放鷹己丑歲星犯軒轅大星庚寅宣政院臣言授諸路釋教都總統輦真木納思爲太中大夫土蕃等處宣慰使都元帥敕畸零拔都兒三百四十七戶佃益都閑田給牛種農具官爲屋居之壬辰山東廉訪司申棣州境內春旱且霜夏復霖澇饑民啖藜藿木葉乞賑卹敕依東平例發附近官廩計口以給三月甲午詔遣脫忽思儂獨赤昔烈門至合敦奴孫界與駙馬闊里吉思議行屯田己亥樞密院臣言出征女直納里哥議於合思罕三千新附軍內選撥千人詔

先調五百人行中書省具舟給糧仍設征東招討司壬寅御史大夫月兒魯等奏比監察御史商琥舉昔任詞垣風憲時望所屬而在外者如胡祇通姚燧王惲雷膺陳天祥楊恭懿高道程文海陳儼趙居信十人宜召寘翰林備顧問帝曰朕未深知俟召至以聞丙午中書省臣言京畿薦饑宜免今歲田租上都隆興平灤河間保定五路供億視他路爲甚宜免今歲公賦漢地河洎隸宣徽院除入太官外官弛其禁便民取食並從之丁未納速刺丁滅里以盜取官民鈔一十三萬餘錠忻都以徵理逋負迫殺五百二十人皆伏誅于巨濟雖無贓帝

以與忻都同惡并誅之中書省與御史臺共定贓罪十三等枉法者五不枉法者八罪入死者以聞制曰可戊申以威寧昌等州民饑成給鈔二千錠賑之己酉以大司農同知宣徽院事兼領以尙饒監事鐵哥翰林學士承旨通政院使兼知尙乘寺寺事刺真並爲中書平章政事兼領舊職中書省臣言左右丞何榮祖以疾平章政事麥木丁以久居其任乞令免署惟食其祿與議中書省事從之以阿里爲中書右丞梁暗都刺爲叅知政事中書省臣言亦奚不薛及八番羅甸旣各設宣慰司又復立都元帥府其地甚狹而官府多宜合二司帥府爲一詔從

之且命奚不薛與思播州同隸湖廣省羅甸還隸雲南
以八番羅甸宣慰使幹羅思等並爲八番順元等處宣
慰使都元帥佩虎符以安南國王陳益稷遙授湖廣等
處行中書省平章政事佩虎符居鄂州庚戌車駕幸上
都賜速哥幹羅思賽因不花蠻夷之長五十六人金紋
綾絹各七十九疋及弓矢鞍轡壬子樞密院臣奏延安
鳳翔京兆三路籍軍三千人桑哥皆罷爲民今復其軍
籍屯田六盤從之敕都水監分視黃河堤堰罷河渡司
庚申免寶慶路邵陽縣田租萬三千九百七十三斛壬
戌給還楊璉真加土田人口之隸僧坊者初璉真加重

賂桑哥擅發宋諸陵取其寶玉凡發冢一百有一所戕
人命四攘盜詐掠諸賊爲鈔十一萬六千二百錠田二
萬三千畝金銀珠玉寶器稱是省臺諸臣乞正典刑以
示天下帝猶貸之死而給還其人口土田隆興府路饑
給鈔二千錠復發粟以賑之夏四月丙子太陰犯氏巳
卯復興瑞監三品弛甘肅酒禁權其酷辛巳弛太原酒
禁仍權酷辛卯設雲南諸路學校其教官以蜀士克五
月甲午遼陽水達達女直饑詔忽都不花趣海運給之
丙午敕雲南邊徼入朝非初附者不聽乘傳所進馬不
給芻豆丁未中書省臣言妄人馮子振嘗爲詩譽桑哥

且涉大言及桑哥敗卽告詞臣撰碑引諭失當國史院編修官陳孚發其姦狀乞免所坐遣還家帝曰詞臣何罪使以譽桑哥爲罪則在廷諸臣誰不譽之朕亦嘗譽之矣詔以楊居寬郭佑死非其罪給還其家資改思州安撫司爲軍民宜撫司隸湖廣省詔諭其民因閔戶驚逃者各使安業以陝西鹽運司酒稅等課已入州縣罷諸子鹽司併罷東平路河道提舉司事入都水監已未龍興路南昌新建進賢三縣水免田租四千四百六十八石是月真定之中山新樂平山獲鹿元氏靈壽河間之滄州無棣景之阜城東光益都之濰州北海縣有蟲

食桑葉盡無蠶六月甲子平江湖州常州鎮江嘉興松江紹興等路水免至元二十八年田租十八萬四千九百二十八石戊辰詔聽僧食鹽不輸課己巳日本來互市風壞三舟惟一舟達慶元路壬申江西省臣言肇慶德慶二路封連二州宋時隸廣東今隸廣西不便請復隸廣東從之鐵旗城後察昔折乙烈率其族類部曲三千餘戶來附甲戌設司籍庫秩從五品隸太府監儲物之籍入者丙子太寧路惠州連年旱澇加以役繁民饑死者五百人詔給鈔二千錠及糧一月賑之仍遣使責遼陽省臣阿散壬午敕以海南新附四州洞寨五百一

十九民二萬餘戶置會同定安二縣隸瓊州免其田租
二年癸未以征爪哇暫禁兩浙廣東福建商賈航海者
俟舟師已發後從其便丁亥湖州平江嘉興鎮江楊州
寧國太平七路大水免田租百二十五萬七千八百八
十三石己丑太白犯歲星鐵木塔兒薛闍禿捏古帶闊
闊所部民饑詔給米四千石付鐵木塔兒薛闍禿一千
石付捏古帶闊俾以賑之閏六月辛卯朔陞上都兵
馬司四品如大都丁酉遼陽瀋州廣寧開元等路雹害
稼免田租七萬七千九百八十八石岳州華容縣水免
田租四萬九百六十二石東昌路蝗壬寅以東安海寧

改隸淮安路詔大都事繁課稅改隸轉運司通州造船
畢罷提舉司罷福建歲造象齒輦帶戊申熒惑犯狗國
庚戌回回人忽不木思售大珠帝以無用却之辛亥河
西務水給米賑饑民江北河南省既立詔江北諸城悉
隸其省詔漢陽隸湖廣省左江總管黃堅言其管內黃
勝許聚衆二萬據忠州乞調軍萬人土兵三千人命劉
國傑討之臣願調軍民萬人以從詔許之太平寧國平
江饒常湖六路民艱食發粟賑之高麗饑其王遣使來
請粟詔賜米十萬石中書省臣言今歲江南海運糧至
京師者一百五萬石至遼陽者十三萬石比往歲無耗

折不足者甲寅右江岑從毅降從毅老疾詔以其子斗
榮襲佩虎符爲鎮安路軍民總管廣南西路安撫副使
賽甫丁等誹謗朝政沙不丁復資給之以風聞三十餘
事妄告省官帝以有傷政體捕惡黨下吏如法乙卯濟
南般陽蝗是月詔諭廉訪司巡行勸課農桑禮部尚書
張立道郎中歪頭使安南回以其使臣阮代乏何維岩
至闕陳日燔拜表牋修歲貢秋七月庚申朔詔以史弼
代也黑迷失高興將萬人征爪哇仍召三人者至闕遣
使檢覈竄名鷹坊受糧者辛酉河北河南道廉訪司還
治汴梁癸亥完大都城也里鬼里沙沙嘗簽僧道儒也

里可溫答赤蠻爲軍詔令止隸軍籍甲子降詔申嚴牛
馬踐稼之禁乙丑阿里願自修船同張存從征爪哇軍
往招占城甘不察詔授阿里三珠虎符張存一珠虎符
仍蠲阿里父布伯所負幹脫鈔三千錠丙寅罷徽州路
錄事司免屯田租一萬二千八百一十一石辛未太陰
犯牛壬申建社稷和義門內壇各方五丈高五尺白石
爲主飾以五方色土壇南植松一株北墉瘞坎壝垣悉
倣古制別爲齋廬門廡三十三楹戊寅黎兵百戶鄧志
願謀叛伏誅庚辰敕雲南省擬所轄州縣官如福建二
廣例省臺委官銓選以姓名聞隨給授宣敕八月己丑

朔賽甫丁處死餘黨杖而徒之仍籍其家產壬辰勅禮
樂戶仍與軍站民戶均輸賦丁酉辰星犯右執法巳亥
太白犯房辛丑寧夏府屯田成功陞其官脫兒赤壬寅
括唐兀禿魯花所部闊冢赤及河西逃人入蠻地者甲
辰車駕至自上都討浙東孟總把等賊敕諸軍之駐福
建者聽平章政事闍里節度乙巳歲星犯右執法丙午
用郭守敬言浚通州至大都漕河十有四役軍匠二萬
人又鑿六渠灌昌平諸水以廣濟署屯田旣蝗復水免
今年田租九千二百十八石丁未也黑迷失乞與高興
等同征爪哇帝曰也黑迷失惟熟海道海中事當付之

其兵事則委之史弼可也史弼爲福建等處行中省
平章政事統領出征軍馬庚戌高苑縣高希允以非所
宜言伏誅壬子詔塔刺赤程鵬飛討黃聖許劉國傑駐
馬軍戍守戊午福建行省叅政魏天祐獻計發民一萬
鑿山鍊銀歲得萬五千兩天祐賦民鈔市銀輸官而私
其一百七十錠臺臣請追其贓而罷鍊銀事從之改燕
南河北廉訪司還治真定高麗女直界首雙城告饑敕
高麗王於海運內以粟賑之弛平瀛州酒禁詔不敦忙
兀魯迷失以軍征八百媳婦國九月巳未朔治書侍御
史裴居安言月的迷失遇盜起不卽加兵盜去乃延誅

平民詔臺院遣官按問之辛酉詔諭安南國陳日燁使
親入朝選湖南道宣慰副使梁曾授吏部尚書佩三珠
虎符翰林國史院編修官陳孚授禮部郎中佩金符同
使安南山東東西道廉訪司劾宣慰使樂實盜庫鈔百
二十錠買庫銀九百五十兩官局私造弓勒等物受屯
田鈔百八十錠樂實宜解職從之丁卯中書省臣言茹
蕪十圍安化等新附洞蠻凡八萬宜設管軍民司以其
上人蒙意蒙世莫仲文爲長官以呂天佑塔不帶爲達
魯花赤八番幹羅思招附光蘭州洞蠻宜置定遠府就
用其所舉秃干高守文黃世曾燕只哥爲達魯花赤知
府同知判官制曰可癸酉徙沔州治鐸水縣廢新得州
置通江縣復漢州綿竹縣沙州瓜州民徙甘州詔於甘
肅兩界畫地使耕無力者則給以牛具農器寧夏戶口
繁多而土田半藝紅花詔令盡種穀麥以補民食丁丑
以平灤路大水且霜免田租二萬四千四十一石辛巳
太白犯南斗罷雲南行臺徙置西川設雲南廉訪司壬
午水達達女直民戶由及地驅出者押回本地分置萬
夫千夫百夫內屯田甲申烏思藏宣慰司言由必里公
及後站驛遂絕民貧無可供億命給烏思藏五驛各馬
百牛二百羊五百皆以銀軍七百三十六戶戶銀百五

十五丁亥從宣政院言置烏思藏納里速古兒孫等三路宣慰使司都元帥冬十月戊子朔詔福建廉訪司知事張師道赴闕師道至乞汰內外官府之冗濫者詔麥木丁何榮祖馬紀燕公楠等與師道同區別之數月授師道翰林直學士日本舟至四明求互市舟中甲仗皆具恐有異圖詔立都元帥府令哈刺帶將之以防海道詔浚浙西河道導水入海庚寅兩淮運使納速刺丁坐受商賈賄多給之鹽事覺詔嚴加鞠問癸巳弛上都酒禁燕公楠言歲終各行省臣赴闕奏事亦宜令行臺臣赴闕奏一歲舉刺之數制曰可丙申四川行省以洞蠻

酋長向思聰等七人入朝壬寅從朱清張瑄請授高德誠管領海船萬戶佩雙珠虎符復以殷實陶大明副之令將出征水手甲辰信合納帖音國遣使入覲廣東道宣慰司遣人以暹國主所上金冊詣京師乙巳太陰犯井丁未太陰犯鬼巳酉樞密院臣言六衛內領漢軍萬戶見存者六千戶撥分爲三力足以備車馬者二千五百戶每甲令備馬十五匹牛車二輛力足以備車者五百戶每甲令備牛車三輛其三千戶惟習戰鬪不他役之六千戶外則供他役庶能各勤乃事而兵亦精銳詔施行之詔擇囚徒罪輕者釋之癸丑完澤等言凡賜諸

人物有二十萬錠者爲數旣多先賜者盡得之及後將
賜或無可給不均爲甚今計怯薛帶怯憐口昔博赤哈
刺赤凡近侍人上等以二百戶爲率次等半之下等又
半之於下等擇尤貧者歲加賞賜則無不均之失矣一
歲天下所入凡二百九十七萬八千三百五錠今歲已
辦者纔一百八十九萬三千九百九十三錠其中有未
至京師而在道者有就給軍旅及織造物料館傳俸祿
者自春至今凡出三百六十三萬八千五百四十三錠
出數已逾入數六十六萬二千三百三十八錠矣懷孟竹課
歲辦千九十三錠尙書省分賦於民人實苦之宜停其

稅帝皆嘉納其言命趙德澤吳榮領逃奴無主者二百
四十戶淘銀耕田於廣寧瀋州乙卯太陰犯氏十一月
庚申岳州華容縣水發米二千一百二十五石賑饑民
壬戌太陰犯壘壁陣戊寅樞密院奏一衛萬人嘗調二
千屯田木八刺沙上都屯田二年有成擬增軍千人從
之己卯太陰犯太微東垣上相癸未禁所在私渡命關
津譏察姦宄丙戌提省溪錦州銅人等洞酋長楊秀朝
等六人入見進方物十二月庚寅中書省臣言皇孫晉
王甘麻刺昔鎮雲南給梁王印今進封晉王請給晉王
印北安王府尉也里古帶司馬荒兀並爲晉王中尉仍

命不只答魯帶狄琮並爲司馬金齒適當忙兀禿兒迷
失出征軍馬之衝資其芻糧立爲木來府敕應昌府給
乞答帶糧五百石以賑饑民癸巳中書省臣言寧國路
民六百戶鑿山冶銀歲額二千四百兩皆市銀以輸官
未嘗採之山乞罷之制曰可庚子太陰犯井甲辰太陰
犯太微西垣巳酉故麓川路軍民總管達魯花赤何散
男布八同趙昇等招木忽魯甸金齒土官忽魯馬男阿
魯來入見貢方物阿魯言其地東南隣境未附者約二
十萬民慕化願附請頒詔旨命布八趙昇諭之從之壬
子敕中書省用烏思藏站例給合里忽必二站馬牛羊

凡爲銀九千五百兩丁巳敕都水監修治保定府沙塘
河堤堰是歲賜皇子皇孫諸王藩戚禁衛邊庭將士等
鈔四十六萬六千七百十三錠給軍士畸零口糧五千
五百二十三石賑其乏者爲鈔三十六萬八千四百二
十八錠命國師諸僧咒師修佛事七十二會斷死獄七
十四

三十年春正月壬戌詔遣使招諭漆頭金齒蠻乙丑敕
福建毋進鶻戍戌和林漢軍四百留百人餘令耕屯杭
海丙寅太陰犯畢命中書汰冗員凡省內外官府二百
五十五所總六百六十九員丁卯安西王請仍舊設常

侍不允罷雲南延慶司以洛波卜兒二蠻酋遙授知州
各賜璽書戊辰樞密院臣奏兀渾察部兀末魯罕軍每
歲運米六千四百二十六石以給之計備直爲鈔萬二
千八百五十二錠詔邊境無事令本軍屯耕以食庚午
驗洞會長楊總國等來朝捏怯烈女直二百人以漁自
給有旨與其漁於水曷若力田其給牛價農具使之耕
甲戌河南江北行省平章伯顏言揚州忙兀臺所立屯
田爲田四萬餘頃官種外宜聽民耕墾揚州鹽轉運一
司設三重官府宜削去鹽司止留管勾襄陽舊食京兆
鹽以水陸難易計之莫若改食揚州鹽蔡州去汴梁地

遠宜陞散府以賴息信陽光州隸之詔皆從其議陞廣
州爲上路總管府罷納速刺丁滅里所立魚鹽局割江
西興國路隸湖廣行省乙亥諡皇太子曰明孝丙子西
番一甸蠻酋三人來覲各授以蠻夷軍民官仍以招諭
人張道明爲達魯花赤丁丑太陰犯氏戊寅詔舊隸乃
顏勝納答兒女直戶四百虛糜廩食令屯田揚州庚辰
歲星犯左執法立豪懿州七驛辛巳置遼陽路慶雲至
合里賓二十八驛驛給牛三十頭車七輛壬午淮西道
宣慰使昂吉兒斂軍鈔六百錠銀四百五十兩馬二匹
敕省臺及扎魯火赤鞠問丁亥遣使代祀嶽瀆東海及

后土二月己丑從阿老瓦丁燕公楠之請以楊璉真加
十宣政院使暗普爲江浙行省左丞詔上都管倉庫者
無資品俸秩故爲盜詐宜於六品七品內委用以俸給
之高麗國王王晷請易名曰晷其簽議府請陞簽議司
降二品印從之減河南江浙海運米四十萬石中書省
添設檢校二員免大都今歲公賦益上都屯田軍千人
給農具牛價鈔五千錠以木八刺沙董之詔以只速滅
里與鬼蠻之民隸詹事院壬辰太陰犯畢丙申却江淮
行樞密院官不憐吉帶進鷹仍敕自今禁戢軍官無從
禽擾民違者論罪丁酉回回李可馬合謀沙等獻大珠

邀價鈔數萬錠帝曰珠何爲當留是錢以賙貧者敕海
運米十萬石給遼陽戍兵仍諭其省官薛闡干令伯鐵
木部欽察等耕漁自養糧不須給甲辰中書省臣言侍
臣傳旨予官者先後七十人臣今欲加汰擇不可用者
不敢奉詔帝曰率非朕言凡來奏者朕祇令諭卿等可
用與否卿等自處之又言今歲給餉上都大都及甘州
西京經費浩繁自今賞賜悉宜姑止從之乙巳熒惑犯
天街丁未車駕幸上都以新附洞蠻吳動熬爲潭溪等
處軍民官佩金符給新附軍三百人人鈔十錠屯田真
定庚戌太陰犯牛辛亥詔發總帥汪惟和所部軍三千

征土番又發陝西四川兵萬人以行樞密官明安答兒
統之征西番敕以韶贛相去地遠分贛州行院官一員
鎮韶州復立雲南行御史臺詔沿海置水驛自耽羅至
鴨淥江口凡十一所令洪君祥董之癸丑太白犯壘壁
陣江西行院官月的迷失言江南豪右多庇匿盜賊宜
誅爲首者餘徙內縣從之申嚴江南兵器之禁三月庚
申以同知樞密院事扎散知樞密院事以平章政事范
文虎董疏漕河之役平章政事李庭率諸軍扈從上都
雨壞都城詔發侍衛軍三萬人完之仍命中書省給其
傭直甲子括天下馬十萬匹己巳立行大司農司洪澤

芍陂屯田舊委四處萬戶詔存其二立民屯二十辛未
太陰犯氐夏四月己亥行大司農燕公楠翰林學士承
旨留夢炎言杭州上海澈浦温州慶元廣東泉州置市
舶司凡七所唯泉州物貨三十取一餘皆十五抽一乞
以泉州爲定制從之仍併温州舶司入慶元杭州舶司
入稅務江南行大司農司自平江徙揚州兼管兩淮農
事省八番重設州縣官罷徽州錄事司皇孫晉王位立
內史府詔諸二品官府自今與各部文移相關鞏昌二
十四城依舊例於總帥汪氏第兄子姪內選用二人壬
寅樞密院臣言去年征爪哇軍二萬各給鈔二錠其後

元史卷十七
本紀
祗以五千人往宜徵元給鈔三萬錠入官帝曰非其人
不行乃朕中止之耳勿徵癸丑太白犯填星廣東肅政
廉訪司復治廣州甲寅詔遣使招諭暹國幹羅思請以
八番見戶合思播之民兼管徙宣慰司治辰沅靖州常
賦外歲輸鈔三千錠不允光州蠻人光龍等一十二人
及邦崖王文顯等二十八人金竹府馬麟等一十六人
大龍番禿盧忽等五十四人來順路彭世彊等九十人
安化州吳再榮等一十三人師壁散毛洞勾答什王等
四人各授蠻夷官賜以璽書遣歸敕江南毀諸道觀聖
祖天尊祠五月丙辰朔給四部更番衛士馬萬匹又給

其必闡赤四百匹壬戌定雲洞蠻酋長來附癸亥括恩
播等處亡宋涅手軍丙寅詔委官與行省官閱覈蠻夷
軍民官以江南民怨楊璉真加罷其子江浙行省左丞
暗普詔以浙西大水冒田爲災令富家募佃人疏決水
道辛未敕僧寺之邸店商賈舍止其物貨依例收稅丁
丑中書省臣言上都工匠二千九百九十九戶歲糜官
糧萬五千二百餘石宜擇其不切於用者俾就食大都
從之甲申真定路深州靜安縣大水民饑發義倉糧二
千五百七十四石賑之六月丙戌敕選河西質子軍精
銳者八百給以鎧仗鞍勒狐貉衣裘遣赴皇孫阿難答

所出征巳丑歲星犯左執法庚寅詔雲南且當仍屬西
番宣慰司改淮西斬黃等路隸河南江北行省丙申太
陰犯斗乙巳以皇太子寶授皇孫鐵穆耳總兵北邊巳
酉詔濬太湖壬子大興縣蝗易州雨雹大如鷄卵秋七
月丁巳敕中書省官一員監修國史巳未詔皇曾孫松
山出鎮雲南以皇孫梁王印賜之詔免福建歲輸皮貨
及泉州織作紵絲庚申命知鶴慶府昔寶赤賚璽書招
諭農順未附蠻寨甲子太陰犯建星巳巳命劉國傑從
諸王亦吉里督諸軍征交趾免雲南屯田軍逋租萬石
壬申以月失察兒知樞密院事丁丑賜新開漕河名

通惠壬申以只兒合忽所汰乞兒吉思戶七百屯田
思合之地辛巳太陰犯鬼八月丙戌括所在荒田無主
名者令放良漏籍等戶屯田庚寅奉使安南國梁曾陳
孚以安南使人陶子奇梁文藻偕來敕福建行省放爪
哇出征軍歸其家甲午辰星犯太微西垣上將戊戌給
安西王府斷事官印甲辰太陰犯畢丁未湖廣行省臣
言海南海北多曠土可立屯田詔設鎮守黎蠻海北海
南屯田萬戶府以董之戊申太陰犯鬼營田提舉司所
轄屯田百七十七頃爲水所沒免其租四千七百七十
二石九月癸丑朔大駕至自上都戊午敕各路達魯花

赤總管董驛事己未明安答兒率軍萬人征土蕃近遣使來言乞引茂州先附寨官赴闕不允己丑立海北海南博易提舉司稅依市舶司例丙寅遣金齒人還歸丁卯太陰犯畢癸酉敕以御史臺贓罰鈔五萬錠給衛士之貧者辛巳登州蝗恩州水百姓闕食賑以義倉米五千九百餘石冬十月癸未朔以侍衛親軍千戶張邦瑞爲萬戶佩虎符將六盤山軍千人及皇子西平王等軍共爲萬人西征賜冠城䟽河董役軍官衣各一襲賜交趾陶子奇等十七人冬衣荆南安置戊子詔修汴堤己丑遣兵部侍郎忽魯禿花等使閣藍可兒納答信合納

帖音三國仍賜信合納帖音會長三珠虎符庚寅饗于太廟彗星入紫微垣抵斗魁光芒尺許凡一月乃滅丙申熒惑犯亢己亥太陰犯天關辛丑太陰犯井壬寅敕減米直糶京師饑民其鰥寡孤獨不能自存者給之甲辰赦天下戊申僧官總統以下有妻者罷之以段貞董開河修倉之役加平章政事庚戌造象蹄掌甲辛亥禁江南州郡以乞養良家子轉相販鬻及強將平民略賣者平灤水免田租萬一千九百七十七石廣濟署水損屯田百六十五頃免田租六千二百一十三石十一月壬子朔改德安府隸黃州路丁巳孫民獻嘗附桑哥助

要東木爲惡及同知上都留守司事又受賊減諸從臣糧詔籍其家貲妻奴復因潭州呂澤訴其刻虐械送民獻至湖廣如澤所訴窮治之立海北海南道肅政廉訪司治雷州庚申敕中書省凡出征軍毋以和顧和買煩其家乙丑太陰犯畢丁卯太陰犯井戊辰以金齒木朶甸戶口增立下路總管府給其爲長者雙珠虎符真定路達魯花赤合散言廉訪司官檢責民官太苛乞以民官復檢責廉訪司文卷從之庚午太陰犯鬼免江南都作院軍匠出征丙子熒惑犯鈞鈴戊寅歲星犯亢巳卯河南江北行省平章伯顏入爲中書省平章政事位帖

哥刺真不忽木上十二月丁亥禁漢軍更番者毋鬻軍器辛卯武平路達魯花赤塔海言女直地至今未定賊一人入境百姓離散臣願往安集之詔以答海爲遼東道宣慰壬辰中書左丞馬紹疾以詹事丞張九思代之乙未太陰犯井遣使督思播二州及鎮遠黃平發宋舊軍八千人從征安南庚子平章政事亦黑迷失史弼高興等無功而還各杖而耻之仍沒其家貲三之一癸卯敕以桑哥沒入官田三百九十一頃八十餘畝給阿合兀闌所司匠戶丙午以鐵赤脫脫木兒齧住拜延四人並安西土傳是歲天下路府州縣等二千三十八路

一百六十九府四十三州三百九十八縣千一百六十五宣撫司十五安撫司一寨十一鎮撫所一堡一各甸部管軍民官七十三長官司五十一錄事司百三巡院三官府大小二千七百三十三處隨朝二百二十一員萬六千四百二十五隨朝千六百八十四戶一千四百萬二千七百六十賜皇后親王公主如歲例賜諸臣羊馬價鈔四十三萬四千五百錠幣五萬五千四百一十錠周貧乏鈔三萬七千五百二十錠作佛事祈福五十一真定寧晉等處被水旱蝗雹爲災者二十九斷死罪四十一

三十一年春正月壬子朔帝不豫免朝賀癸亥知樞密院事伯顏至自軍中庚午帝大漸癸酉帝崩于紫檀殿在位三十五年壽八十親王諸大臣發使告哀于皇孫乙亥靈駕發引葬起輦谷從諸帝陵夏四月皇孫至上都甲午卽皇帝位丙午中書右丞相完澤及文武百官議上尊諡壬寅始爲壇于都城南七里甲辰遣司徒兀都帶平章政事不忽木左丞張九思率百官請諡于南郊五月戊午遣攝太尉臣兀都帶奉冊上尊諡曰聖德神功文武皇帝廟號世祖國語尊稱曰薛禪皇帝是日完澤等議同上先皇后弘吉刺氏尊諡曰昭睿順聖皇

子邊撫軍於北邊三十一年春正月世祖崩親王諸大臣遣使告哀軍中夏四月壬午帝至上都左右部諸王畢會先是御史中丞崔或得玉璽于故臣之家其文曰受命于天既壽永昌上之徽仁裕聖皇后至是手授於帝甲午卽皇帝位受諸王宗親文武百官朝於大安閣詔曰朕惟太祖聖武皇帝受天明命肇造區夏聖聖相承光熙前緒迨我先皇帝體元居正以來然後典章文物大備臨御三十五年溥海內外罔不臣屬宏規遠畧厚澤深仁有以衍皇元萬世無疆之祚我昭考早正儲位德盛功隆天不假年四海缺望顧惟耿質仰荷先皇

帝殊眷往歲之夏親授皇太子寶付以撫軍之任今春宮車遠馭奄棄臣民乃有宗藩昆弟之賢戚畹官僚之舊謂祖訓不可以違神器不可以曠體承先皇帝夙昔付託之意合辭推戴誠切意堅朕勉徇所請於四月十四日卽皇帝位可大赦天下尙念先朝庶政悉有成規惟慎奉行罔敢失墜更賴祖親勲戚左右忠良各盡乃誠以輔台德布告遠邇咸使聞知詔除大都上都兩路差稅一年其餘減下地稅糧十分之三係官逋欠一切蠲免民戶逃亡者差稅皆除之追尊皇考曰皇帝尊太母元妃曰皇太后庚子遣攝太尉兀都帶等請諡于南

郊遣禮部侍郎李衍兵部郎中蕭泰登齋詔使安南中書省臣言陛下新卽大位諸王駙馬賜與宜依往年大會之例賜金一者加四爲五銀一者加二爲三又江南分土之賦初止驗其版籍令戶出鈔五百文今亦當有所加然不宜增賦於民請因五百文加至二貫從今歲官給之從之乙巳賜駙馬蠻子帶銀七萬六千五百兩闊里吉思一萬五千四百五十兩高麗王王矩三萬兩丁未湖廣行省所屬寇盜竊發復令劉國傑討之戊申太白晝見又犯鬼詔存恤征黎蠻爪哇等軍己酉雲南行省以所定路府州縣來上上路二下路十一下州四

十九中縣一下縣五十以金齒歸附官阿魯爲孟定路總管佩虎符是月卽墨縣雹五月庚戌朔太白犯輿鬼壬子始開醮祠於壽寧宮祭太陽太歲火土等星於司天臺戊午遣攝太尉兀都帶奉玉冊玉寶上大行皇帝尊諡曰聖德神功文武皇帝廟號世祖皇后尊諡曰昭睿順聖皇后皇考尊諡曰文惠明孝皇帝廟號裕宗賜國王和童金二百五十兩月兒魯百五十兩伯顏月赤察而各五十兩銀鈔錦各有差庚申祭紫微星於雲僊臺雲南部長適習四川散毛洞主覃順等來貢方物陞其洞爲府丁卯八番宣慰使幹羅思犯法爲人所訟懼

罪逃還京師賜安西王阿難荅鈔萬錠已巳改皇太后所居舊太子府爲隆福宮詹事院爲徽政院司議曰中議府正曰宮正家令曰內宰典醫署曰掌醫典寶曰掌謁典設曰掌儀典饌曰掌饌仍增控鶴至三百人詔各處轉運司官欺隱姦詐爲人所訟者聽廉訪司卽時追問其案牘仍舊例於歲終檢之陞福建鹽提舉司爲鹽轉運司增捕私鹽人賞格庚午諸王亦里不花來朝以瘠馬輸官官酬其直爲鈔十有一萬五千錠賜也速帶而汪惟正兩軍將士糧五萬石餉北征軍壬申御史臺臣言內外官府增置愈多在京食祿者萬人在外尤衆

理宜減併命與中書議之用崔彥言肅政廉訪司案牘勿令總管府檢劾詔議增官吏祿以也速帶而所統將士貧乏給鈔萬錠乙亥以扎珊知樞密院事戊寅封皇姑高麗王王矩妃忽都魯揭里迷失爲安平公主賜亦都護金五百五十兩銀七千五百兩合迷里的斤帖林金五十兩銀四百五十兩西平王與魯赤言汪總帥之軍多庇其富實而令貧弱者應役命更易之以月兒魯爲太師伯顏爲太傅月赤察而爲太保禁諸司豪奪鹽船遞運官物僧道權勢之家私匿盜販是月密州路諸城縣大都路武清縣靉峽州路大水六月庚辰朔日有

食之辛巳御史臺臣言名分之重無踰宰相惟事業顯著者可以當之不可輕授廉訪司官歲以五月分按所屬次年正月還司職官犯贓勅授者聽總司議宣授者上聞其本司聲跡不佳者代之受賂者依舊例比諸人加重帝曰其與中書同議乙酉雲南金齒路進馴象三丙戌以雲南歲貢馬二千五百匹給梁王數太多命量減之庚寅必察不里城敢木丁遣使來貢詔罷功德使司及泉府司官冗員壬辰立晉王內史府復以光祿寺隸宣徽院中書省臣言朝會賜與之外餘鈔止有二十七萬錠凡請錢糧者乞量給之定西平王與魯赤寧遠

王闊闊出鎮南王脫歡及也先帖木而大會賞賜例金各五百兩銀五千兩鈔二千錠幣帛各二百匹諸王帖木而不花也只里不花等金各四百兩銀四千兩鈔一千六百錠幣帛各一百六十匹以帖木而復爲平章政事諸王阿只吉部玉速福屢叛伏誅以甘肅等處米價踴貴詔禁釀酒命月赤察而提調群牧事乙未以世祖皇后裕宗諡號播告天下免所在本年包銀俸鈔及內郡地稅江淮以南夏稅之半乙亥以乳保勞封完顏伯顏爲冀國公妻何氏爲冀國夫人完澤貸民錢多取其息命依世祖定制辛丑浙西道提刑按察使弘書烈帶

阿魯灰受賂遇赦免復以爲河西隴北道肅政廉訪使御史臺臣言先朝決獄隨罪輕重笞杖異施今止用杖乞如舊制不允宋使家鉉翁安置河間年踰八十賜衣服遣還其家癸卯封駙馬闊里吉思爲唐王給金印甲辰詔翰林國史院修世祖實錄以完澤監修國史乙巳給困赤禿出征軍士鈔各千戶千錠丙午太陰犯井以昔寶赤從征諸軍自備馬一千一百九十餘匹命給還其直戊申詔宗藩內外官吏人等咸聽丞相完澤約束以合刺思八斡節而爲帝師賜玉印賜雪雪的斤公主鈔千錠諸王伯荅罕末察合而部貧乏者三千錠伯牙

兀真赤里由柔伯牙伯刺麻闊怯倫忙哥真各金五十兩銀鈔幣有差是月東安州蝗秋七月壬子詔御史大夫月兒魯振臺綱禁內外諸司減官吏俸爲宴飲費置隆福宮衛候司癸丑詔軍民各隸所司無相侵越乙卯以諸王出伯所部四百餘戶乏食徙其家屬就食內郡仍賜以奧魯軍年例鈔三千錠給瓜沙之民徙甘州屯田者牛價鈔二千六百錠以也的迷失爲東昌路達魯花赤中書省臣言其嘗官是郡犯法五百餘款今不宜復官帝曰姑試之己未復立平陽路之蒲武鄉保定路之博野泰安州之新泰等縣賜諸王出伯奧魯軍也速

帶而紅襖軍幣帛各六萬疋庚申改侍衛都指揮使司
爲隆福宮左都威衛使右都威衛使以陝西道廉訪司
沒入贓罰錢舊給安西王者令行省別貯之壬戌詔中
外崇奉孔子癸亥罷肇州宣慰司併入遼東道戊辰減
八番等處所設官二百一十六員八番稱新附九十萬
戶設官四百二十四員及遣官覈實止十六萬五千餘
戶故減之行樞密院月的迷失程鵬飛各加平章政事
中書省臣言樞密之臣不宜重與相銜帝命以軍職尊
崇者授之辛未中書省臣言向御史臺劾右丞阿里嘗
與阿合馬同惡論罪抵死幸得原免不當任以執政臣

謂阿里得罪之後能自警省乞令執政如故從之以軍
戶所棄田產歲入及管軍官吏贖罪等鈔復輸樞密院
癸酉以陝西行省平章不忽木爲中書平章政事甲戌
立隨路民匠打捕鷹房納綿等戶總管府秩正三品詔
招諭暹國王敢木丁來朝或有故則令其子弟及陪臣
入質扎魯花赤言諸王之下有罪者不聞于朝輒自決
遣詔禁治之詔月兒魯守北邊賜其所統軍士幣帛各
萬疋及西征軍士幣三萬疋鈔三萬六千六百錠賜不
魯花真公主及諸工阿只吉女弟伯禿銀鈔有差是月
棟州陽信縣雹大風拔木發屋真定路之南宮新河易

州之涿水等縣雹八月庚辰太白晝見癸未平灤路遷
安等縣水蠲其田租戊子初祀社稷用堂上樂歲以爲
常己丑以大都留守段貞平章政事范文虎監浚通惠
河給二品銀印令軍士復濬浙西太湖澱山湖溝港立
新河運糧千戶所詔諸路平準交鈔庫所貯銀九十三
萬六千九百五十兩除留十九萬二千四百五十兩爲
鈔母餘悉運至京師復立平陽之芮城陵川等縣辛卯
以忙哥撒而妻子爲敵所掠賜鈔八千錠戊戌太陰犯
畢太白犯軒轅是月德州之安德縣大風雨雹九月壬
子聖誕節帝駐蹕三部落受諸王百官賀癸丑詔有司

存恤征爪哇軍士死事之家甲寅口授諸王傅阿黑不
花爲丞相丁巳太白經天庚申以合魯刺及乃顏之黨
七百餘人隸同知樞密院事不憐吉帶習水戰丙寅太
陰掩填星辛未太陰犯軒轅乙亥太白犯右執法太陰
犯平道遣禿古鐵木兒等使閣藍是月趙州之寧晉等
縣水冬十月戊寅車駕還大都辛巳江浙行省臣言陛
下卽位之初詔蠲今歲田租十分之三然江南與江北
異貧者佃富人之田歲輸其租今所蠲特及田主其佃
民輸租如故則是恩及富室而不被於貧民也宜令佃
民當輸田主者亦如所蠲之數從之遼陽行省所屬九

處大水民饑或起爲盜賊命賑恤之江西行省臣言銀
場歲辦萬一千兩而未嘗及數民不能堪命自今從實
辦之不爲額壬午太白犯左執法有事于太廟癸巳太
陰掩填星乙未太陰犯井金齒新附孟愛甸酋長遣其
子來朝卽其地立軍民總管府朱清張瑄從海道歲運
糧百萬石以京畿所儲克足詔止運三十萬石辛丑帝
諭右丞阿里叅政梁德珪曰中書職務卿等皆懷怠心
朕在上都令還也的迷沙已沒財產任明里不花皆至
今未行又不約束吏曹使選人留滯棗哥雖姦邪然僚
屬憚其威政事無不立決卿等其約束曹屬有不事事

者笞之仍以朕意諭右丞相完澤壬寅緬國遣使貢馴
象十乙巳遣南巫里速木答刺繼沒刺矛毯陽使者各
還其國賜以二珠虎符及金銀符金幣衣服有差初也
黑迷失征爪哇時嘗招其瀕海諸國於是南巫里等遣
人來附以禁商泛海留京師至是弛商禁故皆遣之十
一月丁未朔帝朝皇太后于隆福宮上玉冊玉寶庚戌
行樞密院臣劉國傑討辰州賊詔選州民刀弩手助其
軍他不爲例京師犯贓罪者三百人帝命事無疑者准
世祖所定十三等例決之己酉太陰犯亢庚戌廣西鹽
先給引於民而徵其直私鹽日橫及官自鬻鹽民復不

售詔先以鹽與民而後徵之辛亥中書省臣言國賦歲有常數先帝嘗曰凡賜與雖有朕命中書其斟酌之由是歲務節約常有贏餘今諸王藩戚費耗繁重餘鈔止一百十六萬二千餘錠上都隆興西京應昌甘肅等處糴糧鈔計用二十餘萬錠諸王五戶絲造作顏料鈔計用十餘萬錠而來會諸王尙多恐無以給乞俟其還部臣等酌量定擬以聞從之壬子詔以軍民不相統壹罷湖廣江西行樞密院併入行省乙卯令河西僧人依舊助役丁巳以伯顏察而叅議中書省事其兄伯顏言曰臣叨平章政事兄弟宜相嫌避帝曰卿勿復言兄平章

於上弟叅議於下何所嫌也罷貴赤屯田總管府罷宣政院所刻河西藏經板庚申太陰犯畢甲子詔禁作姦犯科者以湖南道宣慰司何偉爲中書叅知政事罷海北海南市舶提舉司壬申立覆實司濟寧路立諸色戶計諸總管府秩四品癸酉太白犯房詔改明年爲元貞元年十二月辛巳賜諸王亦思麻殷金五十兩癸未歲星犯房丙戌罷遼河等處人匠正副達魯花赤丁亥歲星犯鈎鈐甲午以諸王晃兀而駙馬阿失等皆在軍加賜金銀鞍勒弓矢衣服各有差乙未以伯遙帶忽刺出所隸一千戶饑賜鈔萬錠壬辰太陰犯鬼戊戌禁侵擾

農桑者庚子太陰犯房又犯歲星選各衛精兵千人命李羅曷荅兒等將之戍和林聽太師月兒魯節度三年而更用帝師奏釋京師大辟三十人杖以下百人賜諸鰥寡貧民鈔二百錠曲靜澂江普安等路夷官各以方物來貢以東勝等處牛遞戶貧乏賜鈔三千餘錠卜阿里使麻八兒還都阿思民爲海都所虜賜鈔三萬九千九百錠是月常德岳鄂漢陽四州水免其田租是歲斷大辟三十一人

元貞元年春正月戊申諸王阿失罕來朝賜金五十兩銀四百五十兩癸丑以太僕卿只而合朗爲御史大夫

甲寅以從世祖狩杭海功賜諸王忽刺出金五十兩珠一串乙卯太陰犯填星又犯畢壬戌以國忌卽大聖壽萬安寺飯僧七萬癸亥安西王阿難荅寧遠王闊闊出皆言所部貧乏賜安西王鈔二十萬錠寧遠王六萬錠又以隕霜殺禾復賑安西王山後民米一萬石詔道家復行金籙科範以雲南行省左丞楊炎龍爲中書左丞乙丑以亦奚不薛復隸雲南行省以行樞密院旣罷賜行中書省長官虎符領其軍庚午以江淞行省平章阿老瓦丁爲叅知政事壬申立北庭都元帥府以平章政事合伯爲都元帥江淞行省右丞撒里蠻爲副都元帥

皆佩虎符立曲先塔林都元帥府以釁都察爲都元帥
佩虎符饒州路達魯花赤阿刺紅治中趙良不法僉江
東廉訪司事昔班季讓受金縱之事覺昔班自殺杖季
讓除名仍沒其財產奴婢之半罷瓜沙等州屯田癸酉
歲星犯東咸甲戌有飛書妄言朱清張瑄有異圖者詔
中外慰勉之乙亥追封皇國舅按只那演爲濟寧王諡
忠武封皇姑囊家真公主爲魯國大長公主駙馬蠻子
台爲濟寧王仍賜金印詔飭諸道鹽運司二月丙子朔
安西王相鐵赤等請復立王相府不許令陝西省臣給
其所需仍以廉訪司沒入贓罰鈔與之丁丑翰林學士

承旨留夢炎告老帝以其在先朝言無所隱厚賜遣之
命曷伯撒里蠻孛來將探馬赤軍萬人出征聽諸王出
伯節度壬午罷江南茶稅以其數三千錠添入江西權
茶都轉運司歲額詔貸幹脫錢而逃隱者罪之仍以其
錢賞首告者癸未熒惑犯太陰丁亥雲南行省平章也
先不花言敢麻魯有兩夷未附金齒亦叛服不常乞調
兵六千鎮撫金齒置驛入緬從之復以拱衛司爲正三
品以濟寧王蠻子台所部弘吉烈人貧乏賜鈔一十八
萬錠戊子思州田曷刺不花雲南夷卜木四川洞主查
閻王金齒帶梅混冬等來見緬國阿刺扎高微班的來

獻舍利寶玩甲午以探馬赤軍出征馬不足詔除軍民
官吏所乘凡有馬者盡括之壬辰太陰犯平道丁酉車
駕幸上都癸卯太陰犯歲星以諸王亦憐真部馬牛驛
人貧乏賜鈔千錠以工部尙書兼諸路金玉人匠總管
府達魯花赤呂天麟爲中書叅知政事立雲州銀場都
提舉司秩四品中書省臣言近者阿合馬桑哥怙勢賣
官不別能否止憑解由選調由是選法大壞宜令廉訪
司體覆以聞省臺選官覈實定其殿最以明黜陟其廉
訪司官亦令省臺同選爲宜從之罷河西軍聽各還其
所屬賜駙馬那懷鈔萬五千錠以醮延春閣賜天師張

與棣宗師張留孫真人張志僊等十三人玉圭各一製
寶玉五方佛冠賜帝師三月乙巳朔安南世子陳日燾
遣使上表慰國哀又上書謝寬贖恩并獻方物丙午遣
密刺章以鈔五萬錠授征西元帥令市馬萬匹分賜二
十四城貧乏軍校庚戌太陰犯填星壬子禁來朝官歛
所屬俸丙辰給月兒魯禿禿軍炒米萬石金齒夷洞蠻
來見賜衣遣之戊午罷福建銀場提舉司其歲額銀以
有司領之中書省臣言樞密院御史臺例應奏舉官屬
其餘諸司不宜奏請今皆請之非便詔自今已後專令
中書擬奏以東作方殷罷諸不急營造惟帝師塔及張

法師宮不罷壬戌地震太陰犯房丙寅國王和童隱所
賜本部貧民鈔三百五十錠命臺臣遣人按問以愧之
詔免醫工門徭增置蒙古學正以各道肅政廉訪司領
之夏四月辛巳妖人蒙蟲僭擬及其黨十三人伏誅賜
章河至苦鹽貧乏驛戶鈔一萬二千九百餘錠丙戌諸
王也只里以兵五千人戍兀魯思界遣使來求馬帝不
允庚寅太陰犯東咸封乳母楊氏爲趙國安翼夫人癸
巳以同知烏撒烏蒙等處宣慰使司事牙那木假兵部
尚書佩虎符使馬荅兒的陰戌戌給扈從探馬赤軍市
馬鈔十二萬錠庚子立掌謁司掌皇太后寶秩四品以

宦者爲之賜貴赤親軍貧乏戶鈔四萬一千五百餘錠
癸卯以諸王出伯所統探馬赤紅襖軍各千人隸西平
王奧魯赤設各路陰陽教授仍禁陰陽人不得游於諸
王駙馬之門以貴赤萬戶忽禿不花等所部爲敵所掠
賜鈔有差是月真定路之平山靈壽等縣有蟲食桑閏
四月丙午爲皇太后建佛寺于五臺山以前工部尙書
涅只爲將作院使領工部事燕南河北道肅政廉訪使
宋德柔爲工部尙書董其役以大都保定真定平陽太
原大同河間大名順德廣平十路應其所需癸丑歲星
犯房甲寅太陰犯平道立梭釐招討使司以荅而忽帶

爲使佩虎符乙卯太陰犯亢丁巳太陰掩房己未罷打
捕鷹房總管府及司籍周用薄歛等庫及徽州路銀場
各處鹽使司鹽場改設司令司丞仍免大都今歲田租
弛甘州酒禁庚申河南行省虧兩淮歲辦鹽十萬引鈔
五千錠遣扎刺而帶等往鞠實命隨其罪之輕重治之
陝西行省增羨鹽鈔一萬二千五百餘錠山東都轉運
使司別思葛等增羨鹽鈔四千餘錠各賜衣以旌其能
南人洪幼學上封事妄言五運筭而遣之壬戌塔卽古
阿散以不法伏誅詔禁行省行泉府司抽分市舶船貨
而同匿其珍細者戊辰遣愛牙赤覈實高麗國儲糧平

陽民訴諸王小薛曲列失伯部曲恣橫遣官鞠之賜安
南國王陳益稷鈔千錠是月蘭州上下三百餘里河清
三日五月戊寅以魯國大長公主建佛寺于應昌給鈔
千錠金五十兩命麥木丁何榮祖等釐正選法己卯竄
忙兀部別闌于江西俾從月底迷失討賊庚辰詔各省
止存儒學提舉司一餘悉罷之陞江南平陽等縣爲州
以戶爲差戶至四萬五萬者爲下州五萬至十萬者爲
中州下州官五員中州六員凡爲中州者二十八下州
者十五又以戶不及額降連州路爲連州增重挑補鈔
人罪告捕者仍優其賞令犯人給之辛巳罷行大司農

司加平章政事麥木丁爲平章軍國重事中書左丞議
中書省事何榮祖爲昭文館大學士與中書省事甲申
詔自元貞元年五月以前逋欠錢糧者皆罷徵丁亥太
陰犯南斗甲午以諸王阿只吉部貧乏賜鈔二十萬錠
江淞行省臣鐵木而不聽詔遣官責之丙申以伯顏之
子買的爲僉書樞密院事太后言其父盡心王室欲令
代其父官帝以其年尚小故有是命詔以農桑水利諭
中外鞏昌府金州西和州會州雨雹無麥禾饒州鎮江
常州湖州平江建康太平常德澧州皆水六月戊申濟
南路之歷城縣大清河水溢壞民居壬子高麗王王昨

乞爲太師中書令不允以近邊役煩及水災免咸平府
民八百戶今年賦稅詔遼陽省進海東青鷗二十四驛
每驛給牛六頭使者食米五石鷹食羊五口又狗迺十
二驛每戶給鈔十錠甲寅翰林承旨董文用等進世祖
實錄乙卯江西行省所轄郡大水無禾民乏食令有司
與廉訪司官賑之仍弛江河湖泊之禁聽民採取陞沅
州爲路以靖州隸之遣使與各省官就遷調邊遠六品
以下官併左右兩江宣慰司都元帥府宣撫司爲廣西
兩江道宣慰司都元帥府以靖江爲治所仍分司邕州
勅凡上封事者命中書省發緘視之然後以聞詔河西

元史卷十八
僧納租稅癸亥立蒙古軍都元帥府于西川徑隸樞密院以阿刺鐵木而岳樂罕並爲都元帥佩虎符河西隴北道廉訪司鞠張萬戶不法西平王奧魯赤沮撓其事帝命諭之甲子以安西王所部出征軍妻孥乏食給糧二千石昭賀藤邕澧全衡柳吉贛南安等處蠻寇竊發以軍民官備禦不嚴撫字不至皆責而降之駙馬濟寧王蠻子台私殺罪人御史臺臣言其專擅有旨諭蠻子台令知之庚午立西域衛親軍都指揮使司以迷而的斤爲都指揮使是月汴梁路蝗利州蓋州螟秦安曹州濟寧路水輦昌環州慶陽延安安西旱秋七月乙亥徙

甘涼御匠五百餘戶于襄陽詔江南地稅輸鈔丁丑太陰犯亢罷追問已原逋欠普顏怯里迷失公主等俱以其部貧乏來告賜鈔計四十九萬餘錠御史臺臣言內地盜賊竊發者衆皆由國家赦宥所致乞命中書立爲條格督責所屬期至盡滅制曰可乙卯詔申飭中外有儒吏兼通者各路舉之廉訪司每道歲貢二人省臺委官立法考試中程者用之所貢不公罪其舉者職官坐贓論斷再犯者加二等倉庫官吏盜所守錢糧一貫以下笞之至十貫杖之二十貫加一等一百二十貫徒一年每三十貫加半年二百四十貫徒三年滿三百貫者

死計賊以至元鈔爲則給江南行御史臺守護軍百人
減海南屯田軍之半還其元翼詔增給諸軍藥餌價直
壬午立肇州屯田萬戶府以遼陽行省左丞阿散領其
事甲申歲星犯房給塞下貧民鈔二萬四千錠已丑賜
劉國傑王帶錦衣旌其戰功辛卯以禿禿合所部貧乏
賜鈔十萬錠戊戌朱永福邊珍裕以妖言伏誅扎魯忽
赤文移舊用國語敕改從漢字壬寅詔易江南諸路天
慶觀爲玄妙觀毀所奉宋太祖神主大都遼東東平常
德湖州武衛屯田大水隆興路雹太原平陽安豐河間
等路旱八月乙酉太陰犯牛壬子太陰犯壘壁陣辛酉

緬國進馴象三癸亥賑遼陽民被水者糧兩月己巳以
駙馬那懷知樞密院事金復州屯田有蟲食禾汴梁安
西真定等路旱平江安豐等路大水九月甲戌帝至自
上都乙亥用帝師奏釋大辟三人杖以下四十七人戊
寅以八撒而治私第給鹽萬引詔輸米十萬石于權塲
故廩以備北塞以探馬赤軍士所至擾民令令伯鎮之
犯者罪其主將乙卯罷四川淘金戶四千還其元籍罪
初獻言者庚辰罷寧夏路行中書省以其事併入甘肅
行省丁亥爪哇遣使來獻方物己丑給桓州甲匠糧千
石壬辰湖州司獄郭玘訴浙西廉訪司僉事張孝思多

取廩餼孝思繫玘于獄行臺令監察御史楊仁往鞠而
江淞行省平章鐵木而逮孝思至省訊問又令其屬官
與仁同鞠玘事仁不從行臺以聞詔省臺遣官鞠問既
引服皆杖之諸王小薛部衆擾民遣官按問杖其所犯
重者餘聽小薛責之甲午太陰犯軒轅戊戌太陰犯平
道宣德府大水軍民乏食給糧兩月武衛萬盈屯及延
安路隕霜殺禾高郵府泗州賀州旱平江廬州等路大
水冬十月癸卯有事于太廟中書省臣言去歲世祖皇
后裕宗祔廟以綾代玉冊今玉冊玉寶成請納諸各室
帝曰親享之禮祖宗未嘗行之其奉冊以來朕躬祝之

命獻官迎導入廟給江淞河南巡邏私鹽南軍兵杖癸
丑以西北叛王將入自土蕃命平章軍國重事荅失蠻
往征之仍敕便宜總帥發兵千人從行聽其節度甲寅
中書省御史臺臣言江淞行省平章明里不花陳臺憲
非便事臣等議乞自今監察御史廉訪司有所按覈州
縣官與本路同鞠路官與宣慰司同鞠宣慰司官與行
省同鞠制曰可詔諸王駙馬部民既隸軍籍者毋奪回
本部已未賜各衛士貧乏者鈔二萬九千三百餘錠辛
酉辰星犯房壬戌辰星犯鍵閉癸亥賜諸王巴撒而火
而忽荅孫禿刺三部鈔四萬八千五百餘錠丁卯以博

而赤荅刺赤等貧乏賜鈔二萬九千餘錠戊辰太白晝
見太陰犯房遣安南朝貢使陳利用等還其國降詔諭
陳日燭十一月甲戌太白經天及犯壘壁陣辛巳置江
淞行省檢校官二員立江淞金銀洞冶轉運使司乙酉
太陰犯井丙戌毯陽酋長之兄脫杭捧于法而刺酋長
之弟密刺八都阿魯酋長之弟脫杭忽先等各奉金表
來覲丁亥太陰犯鬼戊子賜阿魯酋長虎符癸巳賜安
西王甲冑槍槌弓矢橐鞬等十五萬八千二百餘事戊
戌陞贛州路之寧都會昌二縣爲州以石城縣隸寧都
瑞金縣隸會昌詔江淞行省括隱漏官田及檢劾富强

避役之戶十二月庚子朔遣集賢院使阿里渾撒里等
祭星于司天臺癸卯以駙馬阿不花所部民貧賜鈔萬
錠賜諸王押忽秃忽刺出阿失罕等金各二百五十兩
鈔五百錠丙辰太陰犯軒轅荆南僧普昭等僞撰佛書
有不道語伏誅己未詔大都路凡和顧和買及一切差
役以諸色戶與民均當賜諸王不顏鐵木而阿八也不
千金各五百兩銀五千兩鈔二千錠幣帛各二百疋其
幼王減五分之一以各道廉訪司官八員員一印命收
其三甲子太陰犯天江賜帝師雙龍紐玉印也速帶而
之軍因李璫亂去山東其元駐之地爲人所墾歲久成

業爭訟不已命別以境內荒田給之正軍五頃餘丁二頃已滿數者不給減海運脚價鈔一貫計每石六貫五百文著爲令徙縉山所居乞里乞思等民于山東以田與牛種給之丁卯禁諸王輒召有司官吏已巳詔免軍器匠門徭是歲斷大辟三十人

元史卷十八終

元史卷十九

本紀第十九

皇明翰林學士中大夫知制誥兼脩國史臣宋廉

翰林待制承直郎同知制誥兼國史院編脩官臣王禕等奉勅脩

朝議大夫國子監祭酒臣楊道賓

奉訓大夫右春坊右諭德管國子監書事臣蕭雲舉等奉勅重校刊

成宗二

二年春正月丙子詔蠲兩都站戶和顧和市已卯詔江南母捕天鵝以忽刺出千戶所部屯夫貧乏免其所輸租上思州叛賊黃勝許攻剽水口思光寨湖廣行省調兵擊破之獲其黨黃法安等賊遁入上牙六羅壬午大

陰犯輿鬼詔凡戶隸貴赤者諸人毋爭甲申命西平王
與魯赤今夏居上都丙戌太白晝見安西王傳鐵赤脫
鐵木而等復請立王相府帝曰去歲阿難荅已嘗面陳
朕以世祖定制諭之今復奏請豈欲以四川京兆悉爲
彼有耶賦稅軍站皆朝廷所司今姑從汝請置王相府
惟行王傳事丁亥太陰犯平道己丑御史臺臣言漢人
爲同寮者嘗爲姦人摭摭其罪由是不敢盡言請於近
侍昔寶赤速古而赤分中擇人用之帝曰安用此曹其選
漢人識達事體者爲之御史中丞秃赤爲御史大夫
庚寅太陰犯鈞鈴壬卯令月赤察而也可及合刺赤所

部衛士自運軍糧如其行費甲午授嗣漢三十八代天
師張與材太素凝神竹廣道真人管領江南諸路道教乙
未詔諸王公主駙馬非奉旨毋罪官吏賜諸王合班妃
鈔千二百錠雜幣帛千疋駙馬塔海鐵木而鈔三千錠
回紇不刺罕獻獅豹藥物賜鈔千三百餘錠二月乙亥
朔中書省臣言陛下自御極以來所賜諸王公主駙馬
勲臣爲數不輕向之所儲散之殆盡今繼請者尙多臣
等乞甄別貧匱及赴邊者賜之其餘宜悉止從之分江
浙行省軍萬人戍湖廣給稱海屯田軍農具詔奉使及
軍官歿而子弟未襲職者其所佩金銀符歸于官違者

罪之辛丑立中御府以脫忽伯唐兀並爲中御卿丙午
禁軍將擅易侍衛軍蒙古軍以家奴代役者罪之仍令
其奴別入兵籍以其主資產之半畀之軍將敢有縱之
者罷其職括蒙古戶漸丁以克行伍丁未太陰犯井庚
戌詔軍卒擅更代及逃歸者死給禿禿合所部屯田農
器丙辰詔江南道士貿易田者輸田商稅庚申命札刺
而忽都虎所部戶居于奉聖雲州者與民均供徭役自
六盤山至黃河立屯田置軍萬人丙寅以大都留守司
達魯花赤段貞爲中書平章政事遣使代祀嶽瀆賜安
西王米三千石以賑饑民三月壬申以中書平章政事

不忽木爲昭文館大學士平章軍國事罷太原平陽路
釀進葡萄酒其葡萄酒園民恃爲業者皆還之諸王出伯
言所部探馬赤軍懦弱者三千餘人乞代以強壯從之
仍命出伯非奉旨毋擅徵發以怯魯刺駐夏民饑戶給
糧六月郡王慶童有疾以其子也里不花代之賜八撒
火而忽荅孫禿刺三人鈔各千錠治書侍御史萬僧受
贓命御史臺與宣政院使荅失蠻雜治之癸酉增駐夏
軍爲四萬人忻都言晉王甘麻剌朶兒帶言月兒魯皆
有異圖詔樞密院鞠之無驗帝命言晉王者死言月兒
魯者謫從軍自效詔雲南行臺檢劾亦乞不薛宣慰司

案牘甲戌遣諸王亦只里八不沙亦憐真也里慳甕吉刺帶並駐夏于晉王怯魯刺之地丙子車駕幸上都丁丑以完顏邦義納速丁劉季安妄議朝政杖之徒二年籍其家財之半甲申次大口乙酉太陰犯鈎鈴辛卯賜遼陽行省糧三萬石壬辰詔駙馬亦都護括流散畏吾而戶癸巳湖廣行省以叛賊黃勝許黨魯萬丑王獻于京師賜諸王鐵木兒金二百五十兩銀二千五百兩鈔五千錠以旌其戰功以合伯及塔塔刺所部民饑賑米各千石夏四月己亥朔命撒的迷失招集其祖忙兀臺所部流散人戶賜諸王八十沙鈔四萬錠也真所部六

萬錠平陽之絳州台州路之黃巖州饑杭州火並賑之五月戊辰朔免兩都徭役辛未安西王遣使來告貧乏帝語之曰世祖以分資之難嘗有聖訓何難答亦知之矣若言貧乏豈獨汝耶去歲賜鈔二十萬錠又給以糧今與則諸王以爲不均不與則汝言人多饑死其給糧萬石擇貧者賑之甲戌詔民間馬牛羊百取其一半不滿百者亦取之惟色目人及數乃取丁五太陰犯平道庚辰土蕃叛殺掠階州軍民遣脫脫會諸王鐵木而不花只列等合兵討之甲申命也真薛闡罕駐夏于合亦而之地禁諸王公主駙馬招戶己丑詔諸徒役者限一

年釋之母杖庚寅罷四川馬湖進獨本葱詔諸王駙馬
及有分地功臣戶居上都大都隆興者與民均納供需
丁酉命諸行省非奉旨毋擅調軍安南國遣人招誘叛
賊黃勝許也黑迭失進紫檀賜鈔四千錠是月野蠶成
繭河中府之猗氏雹太原之平晉獻州之交河樂壽莫
州之莫亭任丘及湖南醴陵州皆水濟寧之濟州螟六
月己亥給出伯軍馬七千二百餘匹詔晉王所部衣糧
糧以歲給衣則三年賜之給瓜州沙州站戶牛種田具
御史臺臣言官吏受賂初既辭伏繼以審覈而有司徇
情致令異辭者乞加等論罪從之乙巳太白犯天關以

調兵妨農免廣西容州坐守處田租一年丙午叛賊黃勝
許遁入交趾甲寅降官由受賊條格凡十有三等丁巳
太白犯填星癸亥太陰犯井丙寅詔行省行臺凡朱清
有所陳列毋輒止之賜西平王奧魯赤銀二百五十兩
鈔六千錠所部六萬錠諸王亦憐真所部二十萬錠兀
魯思駐冬軍三萬錠是月大都真定保定太平常州鎮
江紹興建康澧州岳州廬州汝寧龍陽州漢陽濟寧東
平大名滑州德州蝗大同隆興順德太原雹海南民饑
發粟賑之秋七月庚午肇州萬戶府立屯田給以農具
種食辛未以鈔十一萬八千錠給西蕃諸驛甘肅兩州

驛戶饑給糧有差賜諸王完澤印癸酉詔茶鹽轉運司
印鈔提舉司運糧漕運司官仍舊以三年爲代雲南福
建官吏滿任者給驛以歸壬午填星犯井太白犯輿鬼
括伯顏阿木阿里海牙等所據江南田及權豪匿隱者
令輸租河泊官歲入五百錠者勅授增江西河南省叅
政一員以朱清張瑄爲之授特進上柱國高麗王世子
王諤爲儀同三司領都僉議司事乙酉遣雲南省逃軍
戍亦乞不薛命湖廣江西兩省擇駐夏軍牧地丙戌遣
岳樂也奴等使馬八兒國己丑命行臺監察御史鉤校
隨省理問所案牘以虎賁三百人戍應昌諸提調錢正

官其部凡有逋欠者勿遷敘廣西賊陳飛雷通藍青謝
發寇昭梧藤容等州湖廣左丞八都馬辛擊平之辛巳
賜貴由赤戍軍鈔三萬九千餘錠是月平陽大名歸德
真定蝗彰德真定曹州濱州水懷孟大名河間旱太原
懷孟雹福建廣西兩江道饑賑粟有差八月丁酉朔禁
舶商毋以金銀過海諸使海外國者不得爲商庚子太
陰犯亢太白犯軒轅壬寅命江浙行省以船五十艘水
工千三百人沿海巡禁私鹽癸卯太陰犯天江乙巳詔
諸人告捕盜賊者強盜一名賞鈔五十貫竊盜半之應
捕者又半之皆徵諸犯人無可徵者官給乙卯太陰犯

元史卷十九
天街太白犯上將給諸王亦憐真軍糧三月是月德州彰德太原蝗咸寧縣金復州隆興路隕霜殺禾寧海州大雨大名路水九月戊辰太白犯左執法辛未聖誕節帝駐蹕安同泊受諸王百官賀壬申太陰掩南斗甲戌增鹽價鈔一引爲六十五貫鹽戶造鹽錢爲十貫獨廣西如故徵浙東福建湖廣夏稅罷民間鹽鐵爐竈給襄陽府合刺魯軍未賜田者糧兩月罷淮西諸巡禁打捕人員丁丑太陰犯壘壁時戊寅元江賊捨資殺掠邊境梁王命怯薛丹等討降之甲申雲南省臣也先不花征乞藍拔瓦農開陽兩寨廿八黨荅刺率諸蠻來降乞藍悉

平以其地爲雲遠路軍民總管府己丑太陰犯軒轅辛卯諸王出伯言汪總帥等部軍貧乏帝以其父戊命留五千駐冬餘悉遣還至明年四月赴軍甲午令廣海左右兩江戍軍以二年三年更戍海都兀魯思不花部給出伯所部軍米萬石是月常德之沅江縣水免其田租河間之莫州獻州旱河決河南杞封丘祥符寧陵襄邑五縣冬十月丁酉有事于太廟壬寅發米十萬石賑糶京師以宣德奉聖懷來縉山等處牧宿衛馬甲辰修大都城壬子車駕至自上都職官坐贓經斷再犯者加本罪三等贛州賊劉六十攻掠吉州江西行省左丞董士

選討平之是月廣備屯及寧海之文登水十一月丁卯以蠻洞將領彭安國父子討田知州有功賜安國金符子爲蠻夷官荅馬刺一本王遣其子進象十六戊辰以廣西戍軍悉隸兩江宣慰司都元帥府己巳兀都帶等進所譯太宗憲宗世祖實錄帝曰忽都魯迷失非昭睿順聖太后所生何爲亦曰公主順聖太后崩時裕宗已還自軍中所計月日先後差錯又別馬里思丹砲手亦思馬因泉府司皆小事何足書耶辛未徙江浙行省拔都軍萬人戍潭州潭州以南南軍移戍郴州以洪澤芍陂屯田軍萬人修大都城遣樞密院官整飭江南諸鎮戍軍凡將校勤怠者列實以聞增海運明年糧爲六十萬石丁丑太陰犯月星又犯天街庚辰太陰犯井丁亥太陰犯上相乙酉樞密院臣言江南近邊州縣宜擇險要之地合羣戍爲一屯卒有警急易於徵發詔行省圖地形覈軍實以聞戊子太陰犯平道增大都巡防漢軍壬辰太陰犯天江緬王遣其子僧伽巴叔撒邦巴來貢方物罷雲南栢興府入德昌路賜太常禮樂戶鈔五千餘錠是月象食屯水免其田租十二月戊戌立徹里軍民總管府雲南行省臣言大徹里地與八百媳婦犬牙相錯今大徹里胡念已降小徹里復占扼地利多相殺掠

胡念遣其弟胡倫乞別置一司擇通習蠻夷情狀者爲之帥招其來附以爲進取之地詔復立蒙樣剛等甸軍民官癸卯定諸王朝會賜與太祖位金千兩銀七萬五千兩世祖位金各五百兩銀二萬五千兩餘各有差丁未太陰犯井詔諸行省徵補逃亡軍復司天臺觀星戶乙卯太陰犯進賢癸亥釋在京囚百人增置侍御史二員賜金齒羅斛來朝人衣是月大都保定汴梁江陵沔陽淮安水金復州風損禾太原開元河南芍陂旱蠲其田租是歲斷大辟二十四人

大德元年春正月庚午增諸王要木忽而兀魯而不花歲賜各鈔千錠辛未諸王亦憐真來朝薨于道賜幣帛五百疋乙亥給月兒魯匠者田人百畝乙酉以邊地乏芻給出伯征行馬粟四月丙戌以鈔十二萬錠鹽引三萬給甘肅行省昔寶赤等爲叛寇所掠仰食於官賜以農具牛種俾耕種自給己丑以藥木忽而等所部貧乏摘和林漢軍置屯田於五條河以歲入之租資之辛卯以張斯立爲中書省叅知政事諸王阿只吉駐太原河東之民困於供億詔詰問之仍歲給鈔三萬錠糧萬石給晉王所部屯田農器千具建五福太乙神壇時汴梁歸德水木隣等九站饑以米六百餘石賑之給可溫種

田戶耕牛二月甲午朔賜晉王甘麻刺鈔七萬錠安西
王阿難荅三萬錠丙申蒙陽甸酋長納欵遣其弟阿不
刺等來獻方物且請歲貢銀千兩及置驛傳詔卽其地
立通西軍民府秩正四品戊戌陞全州爲全寧府庚子
詔東部諸王分地蒙古戍軍死者補之不勝役者易之
癸卯徙揚州萬戶鄧新軍屯蘄黃以闔里台所隸新附
高麗女直漢軍居潘州甲申諸軍民相訟者命軍民官
同聽之丁未省打捕鷹房府入東京路戊午羅羅斯酋
長來朝己未改福建省爲福建平海等處行中書省徙
治泉州平章政事高興言泉州與瑠求相近或招或取

易得其情故徙之減福建提舉司歲織段三千疋其所
織者加文繡增其歲輸衲服二百其車渠帶工別立提
舉司掌之封的立普哇拿阿迪提牙爲緬國王且詔之
曰我國家自祖宗肇造以來萬邦黎獻莫不畏威懷德
嚮先朝臨御之日爾國使人稟命入覲詔允其請爾乃
遽食前言是以我帥閩之臣加兵於彼比者爾遣子信
合八的奉表來朝宜示含弘特加恩渥今封的立普哇
拿阿迪提牙爲緬國王賜之銀印子信合八的爲緬國
世子錫以虎符仍戒飭雲南等處邊將毋擅興兵甲爾
國官民各宜安業又賜緬王弟撒邦巴一珠虎符酋領

阿散三珠虎符從者金符及金幣遣之以新附軍三千屯田漳州庚申陞寧都會昌縣爲州並隸贛州路寧陽鎮爲縣隸濟寧路隕州巡檢司爲河曲縣隸保德州安豐路設錄事司以行徽政院副使王慶端爲中書右丞詔改元赦天下免上都大都隆興差稅三年給也只所部六千戶糧三月三月戊辰熒惑犯井巳巳完澤等奏定銓調選法庚午以陝西行省平章也先鐵木而爲中書平章政事中書省左丞梁暗都刺爲中書省右丞癸酉太陰掩軒轅大星畋于柳林免武當山新附軍徭賦甲戌西蕃寇階州陝西行省平章脫列伯以兵進討其

黨悉平留軍五百人戍之詔各省合併鎮守軍福建所置者合爲五十三所江浙所置者合爲二百二十七所丙子車駕幸上都丁丑封諸王鐵木而不花爲鎮西武靖王賜馳紐印以江西省左丞八都馬辛爲中書左丞庚辰札魯忽赤脫而速受賂爲其奴所告毒殺其奴坐棗市乙酉遣阿里以鈔八萬錠糴糧和林丁亥禁正月至七月捕獵大都八百里內亦如之庚寅立江淮等處財賦總管府及提舉司賜諸王岳木忽而及兀魯思不花金各百兩兀魯思不花母阿不察等金五百兩銀鈔有差賜稱海匠戶市農具鈔二萬二千九百餘錠及牙

忽都所部貧戶萬錠別吉韃匠萬九百餘錠五臺山佛寺成皇太后將親往祈祝監察御史李元禮上封事止之歸德徐邳汴梁諸縣水免其田租道州旱遼陽饑並發粟賑之岳木忽而及兀魯思不花所部民饑以乳牛牡馬濟之夏四月癸巳朔日有食之丙申中書省御史臺臣言阿老瓦丁及崔或條陳臺憲諸事臣等議乞依舊例御史臺不立選其用人則於常調官選之惟監察御史首領官令御史臺自選各道廉訪司必擇蒙古人爲使或闕則以色目世臣之孫爲之其次參以色目漢人又合刺赤阿速各舉監察御史非便亦宜止於常選

擇人各省文案行臺差官檢校覈宿衛近侍奉特旨令臺憲擢用者必須明奏然後任之之行臺御史秩滿而有効績者或遷內臺或呈中書必自遷調廉訪司亦如之其不稱職者省臺擇人代之未歷有司者授以牧民之職經省臺同選者聽御史臺自調中書省或用臺察之人亦宜與御史臺同議各官府憲司官毋得輒入體察今擬除轉運鹽使司外其餘官府悉依舊例制曰可壬寅賜兀魯思不花圓符賜暹國羅斛來朝者衣服有差賜牙忽都部鈔萬錠給岳木忽而所部和林屯田種以米二千石賑應昌府五月丙寅河決汴梁發民三萬餘人塞

之戊辰安南國遣使來朝追收諸位下爲商者制書驛券命回回人在內郡輸商稅給鈔千錠建臨洮佛寺詔強盜姦傷事主者首從悉誅不傷事主止誅爲首者從者刺配再犯亦誅給葛蠻安撫司驛券一辛未遂寧州軍戶任福妻一產三男給復三歲癸酉太白犯鬼積尸氣乙亥太陰犯房丁丑禁民間捕鬻鷹鷄庚寅平伐酋領內附乞隸於亦乞不薛從之各路平準行用庫舊制選部民富有力者爲副命自今以常調官爲之隸行省者從行省署用上思州叛賊黃勝許遣其子志寶來降漳河溢損民禾稼饒州鄱陽樂平及隆興路水亦乞列等二站饑賑米一百五十石六月甲午諸王也里干遣使乘驛祀五嶽四瀆命追其驛券仍切責之以湖廣行省叅政崔良知廉貧特賜鹽課鈔千錠給和林軍需鈔十萬錠乙未太白晝見戊戌平伐九寨來降立長官司已酉令各部宿衛士輸上都隆興糧各萬五千石于北地甲寅罷亦奚不薛歲貢馬及氈衣丙辰監察御史幹羅失刺言中丞崔彧兄在先朝嘗有罪還其所籍家產非宜又買僧寺水碾違制帝以其妄言笞之詔僧道犯姦盜重罪者聽有司鞠問賜諸王也里干等從者鈔二萬錠朵思麻一十三站貧民五千餘錠是月平灤路蟲

食桑歸德徐邳州蝗太原風雹河間大名路旱和州歷陽縣江漲漂沒廬舍萬八千五百餘家以糧四千餘石賑廣平路饑民萬五千石賑江西被水之家二百九十餘石賑鐵里干等四站饑戶秋七月庚午太陰犯房辛未賜諸王脫脫孛羅赤沙禿而鈔二千錠所部八萬四千餘錠撒都失里千錠所部二萬餘錠罷蒙古軍萬戶府入曲先塔林都元帥府癸未增晉王所部屯田戶甲申增中御府官一員賜馬八兒國塔喜二珠虎符詔出使招諭者授以招諭使副諸取藥物者授以會同館使副但降旨差遣不給制命丙戌以八兒思禿倉糧隸上

都留守司招籍宋兩江鎮守軍丁亥免上都酒課三年賜諸王不顏鐵木而及其弟伯真孛羅鈔四千錠所部八萬四千八百餘錠仍給糧一年寧海州饑以米九千四百餘石賑之河決杞縣蒲口郴州路耒陽州衡州之鄱縣大水山崩溺死三百餘人懷州武陟縣旱八月庚子詔合伯留軍五千屯守令孛來統其餘衆以歸丁未命諸王阿只吉自今出獵悉自供具毋傷民力丁巳祆星出奎揚州淮安寧海州旱真定順德河間旱疫池州南康寧國太平水九月辛酉朔祆星復犯奎壬戌八番順元等處初隸湖廣後改隸雲南雲南戍兵不至其屯

元史卷十九 本紀 十四
駐舊軍逃亡者衆仍命湖廣行省遣軍代之甲子八百
媳婦叛寇徹里遣也先不花將兵討之丙寅詔恤諸郡
水旱疾疫之家罷括兩淮民田汰諸王來大都者及宿
衛士冗員丁卯命平章伯顏專領給賜孤老衣糧壬午
車駕還大都己丑增海漕爲六千五萬石罷南丹州安
撫司立慶遠南丹溪洞等處軍民安撫司詔邊遠官已
嘗優陞品級而託他事不起者奪其所陞官平珠六洞
蠻及十部洞蠻皆來降命以蠻夷官授之給衛士牧馬
外郡者糧令毋仰食於民以札魯忽赤所追贓物輸中
書省衛輝路旱疫澧州常德饒州臨江等路溫之平陽

瑞安二州大水鎮江之丹陽金壇旱並以糧給之冬十
月甲午詔諸遷轉官注闕二年丁酉有事于太廟辛丑
減上都商稅歲額爲三千錠溫州陳空崖等以妖言伏
誅癸丑免陝西鹽戶差稅罷其所給米乙卯爪哇遣失
刺班直木達奉表來降戊午太白經天增吏部尚書一
員以朶甘思十九站貧乏賜馬牛羊有差廬州路無爲
州江潮泛溢漂沒廬舍歷陽合肥梁縣及安豐之蒙城
霍丘自春及秋不雨揚州淮安路饑韶州南雄建德溫
州皆大水並賑之十一月壬戌禁權豪僧道及各位下
擅據鑛炭山場罷順德彰德廣平等路五提舉司立都

元史卷十九 本紀 十五
提舉司二陞正四品設官四員直隸中書戶部衛輝路
提舉司隸廣平彰德都提舉司真定鐵冶隸順德都提
舉司罷保定紫荆關鐵冶提舉司還其戶八百爲民癸
亥詔自今田獵始自九月高麗王王暉告老乞以爵與
其子諫福建行省遣人覘瑠求國俘其傍近百人以歸
戊辰增太廟牲用馬庚午籍唐兀軍入樞密院辛未曹
州禹城進嘉禾一莖九穗丁丑詔以高麗王世子諫爲
開府儀同三司征東行中書省左丞相駙馬上柱國高
麗國王仍加授王暉爲推忠宣力定遠保節功臣開府
儀同三司太尉駙馬上柱國逸壽王增烏撒烏蒙等處

宣慰使一員以孛羅歡爲之賜諸王兀魯思不花金千
兩銀萬五千兩鈔萬錠徙大同改路軍儲所于紅城以河
南行省經用不足命江浙行省運米二十萬石給之總
帥汪惟和以所部軍屯田沙州瓜州給中統鈔二萬三
千二百餘錠置種牛田具大都路總管沙的坐贓當罷
帝以故臣子特減其罪俾仍舊職崔彧言不可復任帝
曰卿等與中書省臣戒之若後復然則置爾死地矣戊
子太白經天增晉王內史一員尚乘寺卿一員賜藥木
忽而金一千二百五十兩銀一萬五千兩鈔一萬二千
錠常德路大水常州路及宜興州旱並賑之十二月癸

元史卷十九
本紀
已令也速帶而藥樂罕將兵出征丙申徙襄陽屯田合
刺魯軍于南陽戶受田百五十畝給種牛田具戊戌中
書省臣同河南平章孛羅歡等言世祖撫定江南沿江
上下置戍兵三十一翼今無一二懼有不虞外郡戍卒
封樁錢軍官遷延不以時取而以已錢貸之徵其倍息
逃亡者各處鎮守官及萬戶府並遣人追捕皆非所宜
又富戶規避差稅冒爲僧道且僧道作商賈有妻子與
編氓無異請汰爲民宋時爲僧道者必先輸錢縣官始
給度牒今不定制僥倖必多無爲磬課初歲入爲鈔止
一百六錠續增至二千四百錠大率斂富民刻吏俸停

竈戶工本以足之亦宜減其數帝曰磬課遣人覈實汰
僧道之制卿等議擬以聞軍政與樞密院議之諸王也
只里部忽刺帶於濟南商河縣侵擾居民蹂踐禾稼帝
命詰之走歸其部帝曰彼宗戚也有是理耶其令也只
里罪之禁諸王駙馬并權豪毋奪民田其獻田者有刑
復立芍陂洪澤屯田壬寅朝洞蠻夷附立長官司二命
楊漢英領之甲辰太白經天又犯東咸丙午太陰犯軒
轅丁未旌表烈婦漳州招討司知事闕文興妻王氏戊
申增給雲南廉訪司驛 十二甲寅太陰犯心乙卯免
上都至大都并宣微等十三站戶和顧和買賜諸王忽

刺出鈔千錠所部四萬四千五百餘錠諸王阿木速哥
鐵木而所部二萬八千九百餘錠閏十二月壬戌太陰
犯壘壁陣命也速帶而等出征詔諸軍戶賣田者由所
隸官給文券甲子福建平章高興言漳州漳浦縣大梁
山產水晶乞割民百戶采之帝曰不勞民則可勞民勿
取壬申徙乃顏民戶于內地定燕禿忽思所隸戶差稅
以三分之一輸官賜忽刺出所部鈔萬錠癸酉至丙子
太白犯建星巳卯賜不思塔伯千戶等鈔約九萬錠淮
東饑遣叅議中書省事于章發廩賑之弛湖泊之禁仍
聽正月捕獵平伐等蠻未附播州宣撫使楊漢英請以

已力討之命湖廣省荅刺罕從宜收撫瓜州屯田軍萬
人貧乏命減一千以張萬戶所領兵補之甲申增兩淮
屯田軍爲二萬人賜諸王阿牙赤鈔千錠所部一萬一
千餘錠藥樂罕等所部七萬錠暗都刺火者所部四萬
餘錠般陽路饑疫給糧兩月是歲濟南及金復州水旱
大都之檀州順州遼陽瀋陽廣寧水順德河間大名平
陽旱河間之樂壽交河疫死六千五百餘人斷大辟百
七十五人

二年春正月壬辰詔以水旱減郡縣田租十分之三傷
甚者盡免之老病單弱者差稅並免三年禁諸王公主

駙馬受諸人呈獻公私田地及擅招戶者丙申遣使閱
諸省兵丁酉置汀州屯田辛丑御史臺臣言諸轉運司
案牘例以歲終檢覆金穀事繁稽照難盡奸僞無從知
之其未終者宜聽憲司於明年檢覆從之乙巳以糧十
萬石賑北邊內附貧民己酉建康龍興臨江寧國太平
廣德饒池等處水發臨江路糧三萬石以賑仍弛澤梁
之禁聽民漁采遣所俘瑠求人歸諭其國使之效順併
土蕃礪門安撫司運司改爲礪門魚通黎雅長沙西寧
遠軍民宣撫司以翰林王暉閻復王構趙與票王之綱
楊文郁王德淵集賢王顥宋渤盧摯耶律有尚李泰郝

采楊麟皆耆德舊臣清貧守職特賜鈔二千一百餘錠
給西平王奧魯赤部民糧三月晉王林米五百石所部
鈔十二萬錠戊和林高麗女直漢軍三萬錠二月戊午
朔詔樞密院合併貧難軍戶辛酉歲星熒惑太白聚危
熒惑犯歲星壬戌徙重慶宣慰司都元帥府於成都立
軍民宣慰司都元帥府於福建乙丑立浙西都水庸田
司專主水利以中書右丞徽政院副使張九思爲平章
政事與中書省事丁卯改泉州爲泉寧府己巳改于瀨
州辛未太陰犯左執法併江西省元分置軍爲六十四
所丙子太陰犯心帝諭中書省臣曰每歲天下金銀鈔

幣所入幾何諸王駙馬賜與及一切營建所出幾何其會計以聞右丞相完澤言歲入之數金一萬九千兩銀六萬兩鈔三百六十萬錠然猶不足於用又於至元鈔本中借二十萬錠自今敢以節用爲請帝嘉納焉罷中外土木之役癸未詔諸王駙馬毋擅祀嶽鎮海瀆申禁諸路軍及豪右人等毋縱畜牧損農乙酉車駕幸上都罷建康金銀銅冶轉運司還淘金戶於元籍歲辦金悉責有司詔廉訪司作成人材以備選舉禁諸王從者假控鶴佩帶擾民詔諸郡凡民播種怠惰及有司勸課不至者命各道廉訪司治之減行省平章爲二員丙子以

梁德珪爲中書平章政事楊炎龍爲中書右丞賜瓜忽而所部鈔三十萬錠近侍伯顏鐵木而等二萬錠也先鐵木而等市馬價三萬四千四百餘錠鎮南王脫歡六萬錠浙西嘉興江陰江東建康溧陽池州水旱並賑恤之湖廣省漢陽漢川水免其田租甘肅省沙州鼠傷禾稼大都檀州雨雹歸德等處蝗三月丁亥朔罷大名路故河堤堰歲入隆福宮租鈔七百五十錠申禁官吏受賂詣諸司首者不得輒受戊子詔僧人犯奸盜詐僞聽有司專決輕者與僧官約斷約不至者罪之庚寅命各萬戶出征者其印令副貳掌之不得付其子弟違法行

事以兩淮閑田給蒙古軍壬子御史臺臣言道州路達
魯花赤阿林不花總管周克敬虛申麥熟不賑饑民雖
經赦宥宜降職一等從之壬子詔加封東鎮沂山爲元
德東安王南鎮會稽山爲昭德順應王西鎮吳山爲成
德永靖王北鎮醫巫閭山爲貞德廣寧王歲時與嶽瀆
同祀著爲令式夏四月戊午遣征不刺壇軍還本部庚
申以也速帶而擅調甘州戍軍遣伯顏等答之賜大都
守門合赤刺等鈔九萬錠織工四萬四千錠發慶元糧
五萬石減其直以賑饑民江南山東江浙兩淮燕南屬
縣百五十處蝗五月辛卯罷海南黎兵萬戶府及黎蠻

屯田萬戶府以其事入瓊州路軍民安撫司罷葺麻林
酒稅羨餘壬辰以中書右丞何榮祖爲平章政事與中
書省事湖廣左丞八都馬辛爲中書右丞淮西諸郡饑
漕江西米二十萬石以備賑貸命中書省遣使監雲南
四川海北海南廣西兩江廣東福建等處六品以下選
戊戌太陰犯心壬寅平灤路旱發米五百石減其直賑
之己酉諸王念不列妃扎忽真詐增所部貧戶冒支鈔
一萬六百餘錠遣扎魯忽赤同王府官追之南輝順德
早大風損麥免其田租一年詔總帥汪惟正所轄二十
四城有安西王諸王等并朶思麻來寓者與編戶均當

賦役耽羅國以方物來貢撫州之崇仁星隕爲石復致用院置和林宣慰司都元帥府以忽刺出耶律希周納鄰合刺並爲宣慰使都元帥佩虎符給兩都八刺合赤鈔各三萬錠六月庚申御史臺臣言江南宋時行兩稅法自阿里海牙改爲門攤增課錢至五萬錠今宣慰張國紀請復科夏稅與門攤併徵以圖陞進湖湘重罹其害帝命中書趣罷之禁權豪幹脫括大都漕河舟楫西臺侍御史脫歡以受賂不法罷禁諸王擅行令旨其越例開讀者併所遣使拘執以聞壬戌陰犯角詔陝西諸色戶與民均當徭役申嚴陝西運司私鹽之禁置奉

宸庫賜諸王岳木忽而金一千二百五十兩兀魯思不花併其母一千兩銀鈔有差山東河南燕南山北五十處蝗山北遼東道大寧路金源縣蝗秋七月癸巳太陰犯心汴梁等處大雨河決壞隄防漂沒歸德數縣禾稼廬舍免其田租一年遣尙書那懷御史劉賡等塞之自蒲口首事凡築九十六所壬寅詔諸王駙馬及諸近侍自今奏事不經中書輒傳旨付外者罪之高麗王王諫擅命妄殺詔遣中書右丞楊炎龍僉樞密院事洪君祥召其入侍以其父拒仍統國政賜諸王亦憐真等金銀鈔有差江西江浙水賑饑民二萬四千九百有奇八月

壬戌太陰犯箕癸未給四川出征蒙古軍馬萬匹九月
巳丑聖誕節駐蹕阻媯之地受諸王百官賀交趾爪哇
金齒國各貢方物給和林更戌軍牛車丙申車駕還大
都辛丑太陰犯五車南星命廣海左右江戌軍依舊制
以二年或三年更代癸卯太陰犯五諸侯樞密副使塔
刺忽帶犯贓罪命御史臺鞫之巳酉太陰犯左執法庚
戌吉贛立屯田減中外冗員冬十月甲寅朔增海漕米
爲七十萬石壬戌太白犯牽牛置蒙古都萬戶府於鳳
翔立平珠六洞蠻夷長官司二設土官四十四員戊寅
太陰犯角距星令御史臺檢劾樞密院案牘賜諸王岳

木忽而兀魯忽不花所部糧五萬石控鶴七百人賜鈔
五百錠十一月庚寅安南貢方物丙申知樞密院那懷
言常例文移乞令副樞以下署行從之罷雲南行御史
臺置肅政廉訪司巳亥太陰犯輿鬼辛丑辰星犯牽牛
罷徐邳鑪冶所進息錢壬寅太陰犯右執法以中書右
丞王慶端爲平章政事賜和林軍校幣六千疋衣帽等
物有差十二月戊午太白經天巳未填星犯輿鬼乙丑
太白犯歲星太陰犯熒惑括諸路馬除牝孕攜駒者齒
三歲以上並拘之賜朶而朶海所部鈔八十五萬錠庚
午鎮星入輿鬼太陰犯上將辛未增置各路推官專掌

刑獄上路二員下路一員詔諸逃軍復業者免役三年
江浙行省平章政事答刺罕陞左丞相甲戌彗出子孫
星下已卯太陰犯南斗辛巳命廉訪司歲舉所部廉幹
者各二人詔和市價直隨給其主違者罪之定諸稅錢
三十取一歲額之上勿增揚州淮安兩路旱蝗以糧十
萬石賑之給陣亡軍妻子衣糧免內郡賦稅諸王小薛
所部三百餘戶散處鳳翔以潞州田二千八百頃賜之
釋在京囚二百一十九人

本紀卷十九 終

